

WANTOK

NIUSPEPA BILONG YUMI OL PAPUA NIUGINI STRETI - 27 VIA NAU

32 pes Namba 1,207 Wik i stat long Fonde Ogas 14, 1997 50 toea

Pait, na pamuk pasin i bikpela long haus kalaus

...bikos ol i sot long kaikai, yunifom, na ol samting: Pakop

WENCESLAUS MAGUN i raitim

BIHAINIM komplem i kam long sampela kalabusman. Dairekta na Loya bilong ICRAF, Powes Pakop i kotim pinis gavman long glasim ol hevi i stap long ol haus kalaus na ol kalabusman long Papua Niugini.

Mista Pakop i makim Jeffrey Malepo. John Siko Wel na Ohi Akueva na ol arapela kalabusmanmeri na pikinini long Bomana haus kalaus. Em i kisim pinis gavman i go long kot. Insait long namba wan Nesenel Kot long Waigani long Julai 25, Mista Pakop i kot wantaim Komanda bilong Bomana haus kalaus, Mathew Jaran, Komisina bilong CIS, Francis Gesa na Stet. Long dispela kot, Mista Pakop i tokim Jas Sheehan olsem stat long taim ol kalaus em i makim ol i go kalaus long Bomana wantaim ol arapela kalabusman, ol i no bin kisim yunifom, ol gutpela samting bilong slip, tawel bilong klinim skin, plet, kap, spun, sop, na marasin bilong wasim maus. Mista Pakop i tokim Jas Sheehan olsem klostu olsem wan yia nau ol kalaus long Bomana MCCI i no bin kisim gut kaikai na planti i no save kisim kaikai long dispela as. Em i tokim kot olsem sampela taim ol kalaus i no save kisim belo na apinun kaikai bikos i nogat kaikai na mani. "Long dispela as, planti taim ol kalaus i save pait long kaikai na sampela

taim mekim pasin pamuk long kisim kaikai." Mista Pakop i tok.

Em i tokim Jas Sheehan olsem long sampela taim, ol kalaus i save kisim wankain kaikai olsem rais na tin sita mit na drai bisket long belo na apinun. Mista Pakop i tokim kot olsem long sampela taim i kam pinis, Bomana MCCI i bungim hevi bilong spes long haus kalaus i pulap insait long ol Sel na Divisen. Em i tok ol Sel we inap holim 15 kalabusman nau i holim antap long 26 kalabusman. "Dispela i save kirapim planti pait namel long ol kalabusman, kamapim pasin pamuk na ol sik i go bikpela," em i tokim Jas Sheehan.

Mista Pakop i tokim kot olsem narapela bikpela hevi i stap longpela

taim long ol haus kalaus em olsem ol wokman bilong haus kalaus i no skelim gut ol kalaus. "Ol yangpela manki na ol lain i no brukim ol bikpela lo i stap wantaim ol bikman na ol kalaus i brukim ol bikpela lo long ol Divisen na ol Sel. Long ol Juvenail Divisen, ol olupela plisman, ami o sekyuriti i save bung wantaim," Mista Pakop i tok.

Em i tokim Jas Sheehan olsem ol samting olsem toilet, haus kaikai, na ol samting bilong kuk kaikai i no stap gut bihainim lo bilong lukautim na was gut long bodi long no ken kisim sik. "Dispela i putim ol kalaus long mak bilong kisim bikpela sik long haus kalaus," Mista Pakop i tok.

Mista Pakop i tok stat long 1994, gavman i katim o i no putim inap mani i go insait long Correctional Service Department long helpim dipatmen bilong karimaut ol wok gut long olgeta haus kalaus insait long kantri. Wanpela bilong ol dispela haus kalaus em Bomana bikpela haus kalaus. "Long dispela as, Correctional Service Department i no inap long mekim gut ol wok bilong en bihainim mama lo na long dispela as ol i brukim lo we i glasim rait na fridom bilong ol kalaus manmeri na pikinini," Mista Pakop i tokim Jas Sheehan.

Ol lo we Mista Pakop i ting ol kalabusman i gat rait long sanap na kot em long: Constitution Section 36 -

Freedom from Inhuman treatment; Constitution Section 37 - Protection of the Law (including provisions of the Correctional Service Institution Act); Constitution Section 49 - Right to Privacy; Constitution Section 57 - Enforcement of Guaranteed Rights and Freedom; na Constitution Section 58 - Compensation.


Long bekim Mista Pakop, Jas Sheehan i givim interim oda i go long Correctional Service Division na i askim ol long go het kwik na stretim ol dispela hevi. Jas Sheehan i askim Correctional Service Division long glasim ol hevi long Bomana haus kalaus (MCCI). Em i tokim ol long bihainim mama lo bilong Papua Niugini Correctional Service Act na givim gut kaikai, yunifom, sop, ol samting bilong slip, taul bilong waswas, plet, spun, kap na ol wankain samting. Jas Sheehan i askim ol tu long painim rot bilong rausim sampela ol kalabusmanmeri na pikinini olsem wanpela we bilong sotim namba bilong ol kalaus long haus kalaus long Bomana.

Jas Sheehan i askim tu Mista Pakop long senisim aplikesen bilong em na putim stret nem bilong ol man husat bai sanap long dispela kot gen long Ogos 22. Bihainim askim bilong Jas Sheehan, Mista Pakop i makim Mathew Jaran, Francis Gesa, Issac Lupari, Minista bilong Finance, Roy Yaki olsem namba foa 'Difenden' na Stet olsem namba faiv 'Difenden.

Wantok i no inap long kisim Seketeri bilong Fainens, Isaac Lupari long tokaut klia long dispela bikos em i stap long miting. Wantok i no inap kisim tingting bilong Komisina bilong Correctional Service Department, Francis Gesa tu.



Kas kisim opis... Madang gavana Jim Kae (lephan) i sanap long opis bilong em bihain long em i kisim biesing bilong kamap gavana, Timmy Tomcoll na ol kabinet memba i sanap wantaim em.



MUTRUS

MAJOR SPONSA BILONG RAGBI LEAGUE INSAIT LONG PAPUA NIUGINI

GOVERNMENT MATTERS: SPOKING IS DANGEROUS TO HEALTH

Plis RIPOT



MOSBI: Taim tambu long Mosbi siti na Sentrel provins i pinis long las wik, Sande Ogas 10 long 4 klok moning. Olsem na plis i askim nau ol papa bilong ol bisnis olsem stua na petrol stesin long lukaut gut long raskol na stil pasin, we i no bin go daun long taim bilong kefuo o taim tambu. Dispela askim i kam aut bihainim sampela bikpela stilpasin, em i bin kamap, maski i gat taim tambu. Hia em sampela bilong ol stilpasin em i bin kamap long Mosbi siti:

• Ripot i tok 4-pela man i bin yusim ol strongpela samting bilong pait na kilim man olsem bus rap na gan. Na go insait long Air Niugini tiket opis long Mosbi dauntaun. Na ranawe long wanpela ka wantaim planti moni.

Plis i tok 4-pela man i giaman olsem ol wokman na kisim saplai i go insait long opis. Na hensapim ol wokman meri na stilim moni.

• Hohola Petrol Stesin em sampela stilman yusim gan em ol yet i wokim wantaim pistol, na brukim bokis mani. Bihain ol i ranawe wantaim moni long wanpela ka em i bin wetim ol. Stilpasin ya i bin kamap long 30 minit i lusim 7 klok nait long las wik, Fraide Ogas 8.

Bihain plis i holimpas 6-pela man long dispela stilpasin

• Long Mosbi Petrol Stesin long Waigani Drav i brukim wankain birua tu. Ripot i tok 6-pela man i yusim ol strongpela pait samting olsem M16 sot gan na 4-pela pistol, draiv i go insait long sevis stesin, hensapim ol wokman meri, na ranawe wantaim K500. Moni ya em ol i kisim long bokis moni.

• Wanpela man i kisim bikpela bagarap, na wanpela 24 aua takasop na haus slip i paia, bihain long wanpela pait. Birua ya i kamap long las wiken long Samaba eria.

Plis ripot i tok pait i kamap namel long tupela grup bilong Tari long Sauten Hailans na ol Galp pipel long Sarere Ogas 9.

Wanpela man i stap nau long han bilong plis long kamapim bagarap long narapela. Na 5-pela arapela em plis i bin kisim na givim sampela askim long ol.

Plis i askim pinis ol pipel bilong dispela tupela grup long sindaun wantaim na stretim dispela hevi.

KIMBE: I gat bikpela pret olsem wanpela Japanis meri na lokol man i ms indai, bihain long bot tupela i ron long en i mas kapsait long solwara long las wiken.

Birua i bin kamap bihain long 7-pela Japanis haiarim wanpela banana bot, we i kisim ol i go ausait lon solwara. Wanpela lokol man i holim stia bilong bot. Dispela em long Sande apinun.

Long solwara, banana bot i kapsait. Na 6-pela Japanis tasol i swim i go long nambis.

Ol helpim wokman meri i bin sekim olgeta hap bilong solwara i long Talasia Poin i go olsem long Hoskins, na i no painim wanpela bodi. Olsem ol plis i bin Japanis meri na lokol man i mas dring wara na indai.

Jim Kas tok long strongim wok bilong Peter Barter

RIJINOL memba bilong Madang Jim Kas i kisim blesing bilong kamap gavana bilong Madang provins we Jas Cosmos Biear i bin witnesim long dispela wik.

Bikpela tok Mista Kas i tok em, ol olupela memba bilong Madang na nesanel gavman i no save wok bung wantaim gut. Tasol long ol lain bilong em nau, ol i gat gutpela pasin poroman na ol bai wok bung gut long sevim Madang provins.

Mista Kas i mekim bikpela tok amamas i go long olupela Madang gavana Peter Barter na George Wan long gutpela wok tupela i bin mekim long taim provinsel rifom i bin stat long kantri.

Em i tok em bai wok klostu wantaim 6-pela nesanel memba bilong Madang long pait strong long kamapim gutpela helpim na developmen bilong Madang provins.

Mista Kas i tok em i luksave olsem olupela gavana na minista bilong Provinsel Afeas Peter Barter i bin mekim bikpela wok long stat bilong rifom. Olsem na em bai lukim olsem gutpela mak na wok Peter Barter i bin kamapim

pinis i stap yet na ol bai wok bihainim.

Insait long dispela seremoni, Jim Kas i tokaut long ol kabinet bilong em. Ol kabinet memba em:

Elliot Paru Siaman bilong Nesanel Risoses, Nick Mare Siaman bilong Komes, Joe Tola Siaman bilong Provinsel Afeas, Kingsley Yomyomb Siaman bilong Helt, Hon Stalh Musa Siaman bilong Woks, Gavana Jim Kas Siaman bilong Madang Interim Provinsel Gavman na Siaman bilong Fainens.

Mista Kas i tok bihain long Lokol Gavman Kaunsel ileksen i pinis, em bai tokaut long ful kabinet memba long bihain.

Ol arapela nesanel memba bilong Madang i no holim wanpela sia bilong siaman insait long Madang Interim Gavman bikos ol i holim wok ministri insait long nesanel gavman.

Wanpela bikpela wok bilong gavana Jim Kas nau em long stapim olgeta nesanel memba long i no ken gat opis bilong ol yet insait long Provinsel Asembli. Dispela em wanpela rot bilong stapim mani long i no ken go aut nabaut.



• Madang Gavana Jim Kas i sikan wantaim olupela gavana George Wan taim em kisim opis long dispela wik.

Japan givim televisen masin long edukesen dipatmen

WANTAIM helpim bilong samting olsem K600,000 mak bilong ol masin bilong wokim piksa we Japan gavman i givim long dipatmen bilong Edukesen long Ogas12, ol sumatin bilong Papua Niugini nau inap lainim planti nupela na gutpela save.

WENCESLAUS MAGUN i raitim

Dispela em namba wan helpim aninit long Japanis Grant Asistens Progrem (JGAP) Japan i givim i go long nupela gavman bilong PNG bihain long namba siks jenerel ileksen.

Long makim Japan, Ambasadu Yasuhide Hayashi i givim ol dispela masin i go long Minista bilong Edukesen, Kalsa na Saiens, Gabriel Dusava long 'Curriculum Development Unit' bilong Edukesen Dipatmen long Mosbi Insevis Koles.

Edukesen dipatmen bai yusim ol dispela masin long redim ol meteriel bilong tis, long soim ol piksa long EMTV, na bilong yusim insait long ol 'curriculum' bilong sampela ol skul na hapim stendet bilong kisim save.

Ambasadu Hayashi i tok, gavman bilong Japan i luksave olsem sapos wanpela kantri i laik go het, em i mas i gat ol pipel i kisim gutpela save.

"Mi bilip planti bilong yupela bai sapotim mi long tok olsem sapos wanpela kantri inap traime givim sans long olgeta ol pikinini long kisim gutpela save, long bihain taim, ol dispela pikinini inap wok hat long bringim gutpela developmen long kantri wantaim strong bilong em yet," Mista Hayashi i tok. Em i tok em i hop edukesen dipatmen bai yusim gut na lukautim ol piksa masin samting Japan i givim i go long PNG.

Minista bilong Edukesen Gabriel Dusava i givim bikpela tok tenkyu i go long Japan.

"Mi amamas tru na givim bikpela tok tenkyu i go long gavman bilong

Japan long ol sapot oltaim Japan i givim PNG bilong strongim ol wok developmen," Mista Dusava i tok.

Mista Dusava i tok em bai yusim gut mani na painim ol gutpela rot bilong bringim save i go long ol pipel. "Mi bilip olsem mipela i mas yusim ilektronik media, olsem radio na televisen bilong givim kwaliti edukesen long ol pipel bilong mipela," em i tok.

Mista Dusava i tokaut olsem Japan i save helpim PNG wantaim planti samting long helt, edukesen, na ol infrastraksa developmen o wok bilong mekim rot, bris, haus sik, ples balus na ol sku. Na dispela kain pasin nau Japan i mekim em i no nupela samting. Em i tok Japan em i namba wan kantri i go pas long helpim PNG.

Mista Dusava i tok wantaim dispela mani Japan i givim ol i bin yusim pinis long stretim na kamapim gut ol masin insait long televisen seksen, mekim em i go moa bikpela insait long ol hai skul, tisa koles na ol i ting long mekim wankain tu long ol praimer skul.

Em i tok wanpela wok painim aut i soim olsem planti lain i gat laik long yusim radio na televisen bilong kisim save. Na planti ol skul long PNG i go het pinis long yusim ol radio na televisen.

Mista Dusava i tenkim tu Japan long givim ol sola penel o ol samting we inap yusim lait bilong san na givim lait long nait. Em i tok wantaim ol dispela sola penel planti skul nau inap stadi na mekim wok long nait. Em i tok dispela ol kain helpim Japan i givim i strongim tru tingting bilong rifom gavman bilong PNG i gat.

Mista Dusava i amamas long tokaut olsem televisen unit bilong dipatmen i kamapim pinis sampela gutpela progrem bilong ol hai skul tisa na bilong ol trening progrem insait long kantri.

Ol i kamapim pinis ol progrem bilong 'literacy, science, social science, agriculture na health'.

Olpela Lae ples balus bai kamap bisnis senta

MOROBE gavana Luther Wenge i strongim tok-tok olsem olupela Lae ples balus i no inap long op gen. Tasol ol bai tanim dispela ples balus i kamap olsem hap bilong kirapim ol wok bisnis.

Gavana Wenge i tok olupela Lae ples balus i gat ol hevi we i no gutpela moa long ol balus i pundaun long em gen. Ol tok save na tok lukaut i kam long Dipatmen bilong Sivel Eviesen i (DCA) i tokaut kila olsem olupela Lae ples balus i no gutpela moa long yusim, Mista Wenge i tok.

Mista Wenge i tok em i luksave long ol hevi na wari bilong ol pipel bilong Morobe long rot bilong balus i go long ples bilong ol na Lae. Olsem na gavman bilong em bai traime painim arapela hap we i gutpela long stretim dispela hevi bilong ol pipel insait long ol aspies husat i save yusim transpot sevis bilong balus tasol.

Gavana Wenge i tok narapela hevi nau i wok long kamap em, Lae Siti i wok long sot long graun bilong kirapim na mekim ol wok long en. Olsem na olupela ples balus em wanpela gutpela hap we Lae Siti i ken yusim long kirapim ol wok bisnis long en.

Provinsel gavman i statim pinis wok bilong sevei o stadi insait long dispela ples balus aninit long bikpela tingting bilong pulim moa invesmen na bisnis i kam long Morobe provins. Dispela sevei bai pinis liklik taim na gavman bai putim tenda long open maket long ol bisnis na grup i ken resis long winim.

Mista Wenge i tok gavman i tingting long sanapim ol bikpela supra maket, haus bilong slip, ol bikpela opis bilong kampani na bisnis na ol gavman opis tu bai sanap long dispela olupela Lae ples balus.

Bikpela senis tu long stretim rot long dispela hap i stap tu insait long plen bilong AusAID progrem.

Mista Wenge i tok olupela Lae ples balus em graun bilong gavman na gavman i ken mekim wanem samting em i laik wantaim.

Wanpela hevi nau em ol liklik balus kampani long Lae i wok long pinis nau. Na dispela i givim hevi long ol manmeri long ron bilong balus i go long ol aspies bilong ol, Mista Wenge i tok.

Long dispela as, gavman bilong mi bai wok strong long kirapim na wok strong long wok bilong opim moa rot na bris insait long provins insait long 10-pela krismas i kam. Dispela wok bai inap long bungim olgeta 9-pela distrik bilong Morobe provins wantaim Lae Siti long rot bilong ka, gavana Wenge i tok.

WANTOK

All departments, Phone: 325 2500 - Fax: 325 2579 P.O. Box 1982, Boroko, NCD, Papua New Guinea.

Published Weekly, Thursday, for Word Publishing Company Pty. Ltd. Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and Group Editor in Chief: Anna Solomon. Papers distributed by air throughout PNG. Available by airmail subscription within Papua New Guinea and overseas. Advertising Manager: Mike Kanin. Editor of Wantok: Leo Watifa.

Advertising deadlines, Display Bookings and Camera ready copy: Tuesday midday. Classified Advertising: Wednesday 2pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official Display Advertising Booking Form.

WANTOK

NIUSPEPA BILONG OL PNG STRET

NBC no sevim gut rurel pipel, na TV stesin laik kamap

Dispela wik Komyunikesens Minista Simeon Wai tok gavman i plenim long kamapim wanpela nupela televisen stesin, we bai kam aninit long Nesenel Brodkasting Komisen (NBC).

Minista i tok gavman i kamap wantaim dispela plen bihainim tingting o tokorait bilong ol save-man.

Long las wik, Dairekta bilong NBC, Renagi Lohia, i i tokaut long ripot bilong em i go long Minista Simeon olsem NBC i sot long moni. Na i luk olsem planti radio stesin long ol provins, husat i kam aninit long NBC, bai pas.

Antap long dispela, planti wok samting bilong NBC opis long Mosbi, na tu long ol provinsal radio stesin i bagarap.

Dispela i no nupela stori bilong NBC. Em bilong bipo yet i kam inap nau.

Olsem na wantaim dispela hevi i stap yet, em bai olsem wanem long nupela TV stesin. Mipela i no tingting long givim gutpela sevis i go long ol rurel pipel wantaim ol provinsal radio stesin yet, na nau mipela i laik kamapim nupela TV stesin.

Nupela TV stesin bai sevim tasol ol siti na taun pipel, na olsem wanem long ol rurel pipel.

Luk olsem kantri i no redi yet long dispela plen. Mipela mas wokhat long lukim olsem ol provinsal radio stesin i sevim gut pipel, na bihain mipela gen go long ol arapela senis olsem long TV.

Lus tingting long ol kain bilip olsem nupela TV stesin bai kamap bisnis han olsem FM, na lukautim em yet. Dispela i no kamap long FM stesin.

Olsem hap tok i stap pinis, yu mas putim long-pela trausis pastaim na bihain putim su. Yu no inap putim su na bihain painim hat long go insait long longpela trausis.

Maski ol saveman i givim mipela aidia na tingting, mipela yet tu mas skelim gut pastaim. Na bihain mekim disisen.

Kot i wetim Yama, Yamandi na Karo

KOT I NO inap sasim tripela olupela memba bilong palamen bikos ol i no moa memba bilong palamen. Ol tripela lida ya em; Peter Yama olupela memba bilong Sumkar na Minista bilong Trensport na Woks, Albert Karo olupela memba bilong Mosbi Saut na Amos Yamandi olupela memba bilong Nawae Open.

YAKAM KELO i raitim

Opis bilong Pablik Prosekyuta i tok tripela lida ya i no moa memba bilong palamen olsem na lo bilong Lidasip Kod o lo i sut long kotim ol lida i no inap mekimsave long ol. Na tu Sief Jastis i no inap long makim Lidasip Traibunel long kisim ol i go long kot.

Pablik Prosekyuta, Panuel Mogish i tokaut long ripot bilong em olsem ol bai wet tasol na harim sapos tripela olupela memba ya i kisim bek wanpela bikpela wok we i stap aninit long nem bilong gavman, bai ol tripela i kamap long kot.

Mista Mogish i tok Pablik Prosekyuta i bin kisim tripela lidasip ripot i kam long Ombudsmen Komisin egensim tripela olupela memba bilong palamen ya long Julai 14, 1997.

Ombudsmen Komisin i painim olsem ol tripela olupela lida ya i gat sampela asua long kamapim ol bagarap na paulim ol samting insait long opis aninit long nem



• Peter Yama.

bilong ol olsem lida na memba bilong palamen.

Tasol lo bilong Lidasip Kod i no inap kisim ol i go long kot nau bikos ol i no memba bilong palamen moa. Tasol sapos ol tripela i kisim wok bihain insait long provinsal gavman o wanem gavman opis, bai ol i go long kot. Dispela em wankain stori olsem olupela memba bilong Nawae Timothy Bonga, husat i bin lusim kot bilong Lidasip Traibunel na stap nating. Taim em kisim wok olsem siaman bilong Lae Siti Atoriti, kot ya i kirap gen. Mista Bonga i lusim wok gen na stap ausait long pablik opis.

70 kendidet bai kot long ileksen risal

NESENEL Kot long Waigani i gat pinis nem bilong 70 kendidet long salensim ol memba husat i bin win long nesenel ileksen long las mun.

Ol sampela olupela memba husat i lusim sia bilong ol tu i laik kot gen egensim ol risal bilong ileksen. Ol olupela na biknem lida olsem olupela praim minista Sir Julius Chan bai kot gen long sit bilong Namatanai we Ephraem Apelis i winim, Ben Micah bai kot long Kavieng Open we Ian Lee Stuckey i winim, David Unagi bai kot long Mosbi Not Is sit we Philip Taku i winim, Albert Karo bai kot long Mosbi Saut sit we Ledi Carol Kidu i winim, John Giheno bai kot long Henganofi sit we Viviso Seravo i winim, Perry Zeipi bilong Westen provins, Peter Yama bilong Sumkar Open we Mathew Gubag i winim, David Mune bilong Sauten Hailans bai kot long rijinol sit nau Anderson Agiru i winim, Ben Okorro bilong Sinasina, Aita Ivarato bilong Isten hailans rijinol, Avusi Tanao bilong Kainantu, Mathias Ijape bilong Goroka Open na Daniel Tulapi bilong Kagua Erave sit.

Ol memba bilong palamen husat nau bai sanap long kot long strongim tok na holim bek sit bilong ol em, Chris Haiveta Galp, Fabian Pok Not Wagi, Puri Ruing Dei, Jack Genia Abau, Gabriel Dusava Yangoru Sausia, Philip Taku Mosbi Not Is, Ledi Carol Kidu Mosbi Saut, Michael Nali Mendi, Kuk Kuli Aglip Saut Wagi,

Smith Henry Iyapo Goroka, Philemon Embel Nipa Kutubu, Robert Nagle Baiyer Mul, Andrew Baing Makam, David Basua Kagua Erave, Bill Skate NCD rijinol, Sir Mekere Morauta Mosbi Not Wes, Castan Maibawa Okapa, Bart Philemon Lae, Mathias Karani Lufa, Viviso Seravo Henganofi, George Wan Usino Bundi, Damson Lafana Unggai Bena, Mathew Gubag Sumkar, Baki Reipa Kainantu, Gallus Yambui Wosera Gawi, Anderson Agiru Sauten Hailans rijinol, Ginson Saonu Kabwum, Samson Napo Bulolo, Ludger Mondo Sinasina Yongomul, Yauwe Riyong Chuave, Peti Lafanama Isten Hailans rijinol, Pater Loise Ambane Simbu rijinol, Jacob Wama Madang Open, Ling Stuckey Kavieng, Ganaufo Ron Daulo, Sir Pita Lus Maprik, Masket langalio Wapenamanda, Kennedy Wenge Nawae, Bernard Vogae Wes Nu Briten rijinol, Peterson Lowa Talasea, Peter Arul kandrian Gloucester, Ebenosi Moyola Kiriwina Goodenough, Ephraem Apelis Namatanai, Michael Ogio Not Bogenvil, Samuel Akotai Sentrel, Bogenvil, Tukape Masani Huon Galp, Bia Elali Ajax Gollala, Bernard Mollok Bogia, Tommy Tomscoll Midel Ramu, Riddler Kimave Kikori, Moi Avei Kairuku Hiri na John Kamb Kerowagi.

Ripot i tok i luk olsem bai namba bilong ileksen petisen i go antap moa long 100. Bikos planti lain i wok long toktok yet na salensim ileksen risal.

Inguba rausim 7-pela plisman

BOS bilong ol plisman long Mosbi na Sentrel. Asisten Komisina Sam Inguba i rausim 7-pela plisman i go stap ausait na wetim kot bilong ol long holim na bagarapim tupela meri.

Mista Inguba i tok i tru i bin gat ripot long ol plisman i bin holim na bagarapim tupela meri long Sarere Ogas 2, 1997. Ol plisman i bin kisim tupela meri ya long 3 Mail na kisim tupela i go long Pari Rot we ol i bagarapim tupela.

Mista Inguba i tok 6-pela em ol Spesel Konstebel na wanpela em fultaim plisman. Ol 6-pela Spesel Plisman i pinir olgeta long wok plis fos na ol bai wetim kot bilong ol long kamap. Plisman tru ya i stap long saspensen na em wetim kot tu long kamap.

Divisenel Plis Komanda, Mista Inguba i tok dispela raske pasin ol plisman

mekim long gutpela tru na long stret tru long wok bilong ol plisman we wok bilong ol em long lukautim ol pipe insait long siti. "Mi no inap wanbel wantaim ol plisman o plismer bilong mi husat i stap insait long kain raske pasin olsem Ol bai kamapim nem nogut bilong plis fos. "Long save bilong mi ol dispela 7-pela plisman, nogat ples long plis fos". Mista Inguba tok. Tasol narapela ripot we i tok long 40 man i holim meri na bagarapim long Waigan na plisman i was long ol no tru. Mista Inguba tok.

Mista Inguba tok bin gat ripot olsem ol man i holim na bagarapim meri long Waigan Gavman Hoste. Olsem na ol plisman tingting o man i bagarapim meri long dispela taim olsem na ol go insait long painimaut long dispela

WANTOK

NIUSPEPA BILONG OL PNG STRET

P O Box 1982 BOROKO
Telepon namba: 325 2500

Feks namba: 325 2579

**PE BILONG WANPELA
YIA 52 NIUSPEPA**

PLES	AIR
Mosbi	K 40.00
Arapela PNG eria	K 75.00
Australia na Nu Silan	K115.00
Esia pasifik na Japan	K150.00
Amerika na Yurop	K215.00

TORO

TORO AMAMAS TRU OLSEM BRAKS BILONG EM CHRIS I WINIM ELECTION LONG PLES...

BAGA INO WET. EM GIVIM SIKSTI IGO LONG PALAMEN HAUS LONG LUKIM EM...




LONG HAP OL SEKURITI STOP EM NA ASKIM EM...



NAU OL I RINGIM CHRIS NA ASKIM EM...



KON MAN! AUT!!



Ol Bogenvil stori

Ol Bogenvil lida bai toktok wantaim Ona

Veronica Hatutasi i raitim

GUTPELA wokbung i het nau namel long Bogenvil. Trensisenel Gavman na ol Bogenvil Revolusener. Ami Bogenvil Interim Gavman lida long traim paim bel isi pasin na kamapim bek gutpela sindaun long Bogenvil.

Ol ripot i kam long Bogenvil i tokaut olsem gutpela timwok i stap pinis long graun namel long ol BRA/BIG lida. BTG ol sifis na ol inter- atorit siaman long

toksave long ol pipel long ol samting we ol bin toktok long en long Nu Silan.

Nau olgeta dispela grup i karimaut ol awenes i go long ol pipel na Joseph Kabui i go pas long BRA/BIG grup long karimaut awenes long eria bilong ol. Long ol ripot Wantok i kisim, BRA lidasip i bruk nau bikos Francis Ona i no wanbel long sampela samting we ol Bogenvil lida i bin toktok long en long Nu Silan long las mun. Wanem em no ama-

mas long en em ol lida i no tokaut strong long Bogenvil i bruk lus long PNG na kisim indipendens.

Tasol ripot i gat bilip olsem Mista Kabui na lain bilong em bai go sindaun toktok wantaim Ona na em bai kisim sampela gutpela tingting.

Ripot i tok planti Bogenvil lida i lukim olsem ailan i no inap long kisim ful indipendens kwiktaim na dispela samting em ol i pait strong long en na bagarapim laip na sindaun bilong ol pipel. Bung long Nu Silan i bin mekim planti bilong ol i luksave long dispela na nau ol i laik wok strong long bringim bel isi na gutpela sindaun pastaim long ailan. Na bihain sapos olgeta samting i kamap orait, ol i ken lukluk long bihain taim bilong Bogenvil.

Ripot i tok Kabui na Kauona i wanbel olsem ol bai wok wantaim BTG aninit long mama lo bilong PNG bilong traim stretim hevi long ailan.

Nau BTG wantaim BRA/BIG lidasip i wok long skulim ol pipel long rot bilong wokbung wantaim na stretim hevi na dispela ol mekim long ol aweanes long redio.

Long wankain taim tu, BRA/BIG i wok long toktok long ol meknais i kamap long Notwes eria na gutpela toktok i wok long go het.

Kempen i kisim ol man i kam aut long hait



• Ol manmeri na pikinini i lukluk long gem.

BARBARA MASIKE i raitim

PLANTI pipel husat i stap aninit long BRA rul i wok long kam aut long ol hap we Gavman i stap bihain long ol i harim olsem pis na gutpela sindaun bai kamap klostu long Bogenvil.

Dispela em wanpela kempen we i wok long kamap long Bogenvil ailan we ol lidaman bilong BTG na BRA/BIG i go het long tokim ol pipel long ol toktok i bin kamap long Nu Silan.

Bogenvil Primia Gerard Sinato i go pas long dispela kempen long sait bilong BTG na Joseph Kabui i go pas long sait bilong ol BRA/BIG.

Kempein i stat olsem wanpela wik nau. Mista Sinato i toktok long Redio Bogenvil na tokim ol pipel long ol samting ol BTG na

ol BRA/BIG i bin toktok long em long Christchurch long Nu Silan.

Long sait bilong ol BRA/BIG Joseph Kabui i kamap long rebel steson redio Fri Bogenvil na autim ol toktok i bin kamap long New Zealand.

Wanpela mausman bilong BTG i tok olsem kempen i wok long go gut tru. Olsem na planti pipel tu i wok long kam aut nau. Em i tok olsem samting olsem 3000 pipel i kam aut long Not Wes na Saut Wes Bogenvil pinis bihain long dispela kempen i stat. Em i tok 2000 pipel i kam aut long Kurao long Not Wes Bogenvil na samting olsem 1000 i kam aut long Sovele long Saut Wes Bogenvil.

Em i tok tu olsem long dispela Fraide bai i gat wanpela pis seremoni i kamap insait long Bana komyuniti gavman eria.

Ol ripot tu i tok olsem pastaim ol pipel i bin pret taim ol i harim

olsem ol PNG difens Fos bai lusim ailan. Tasol bihain ol i harim gut olsem dispela bai kamap isi isi na ol i amamas.

Mista Sinato taim em i toktok long redio Bogenvil i tok strong olsem bai ol Bogenvil lidas i mas putim tingting wantaim na mekim kamap dispela Burhnam Declaration.

Em i askim ol Kaunsel ov Sifs, Kaunsel ov Eldas na ol lida bilong olgeta Interim Atoriti long helpim long mekim kamap ol pis toktok i bin kamap long Nu Silan.

Em i tokim ol pipel taim em i toktok long redio Bogenvil olsem Prait Ministia Bill Skate i putim olgeta sapot bilong em na bilong nesene gavman i go pinis long dispela ol toktok bai ol i mas karim kaikai.

Primia Sinato i bin wokim ol toktok long Sarere i go pinis long redio Bogenvil.

RAUSIM SIK POLIO, MISEL NA TETANAS

1997 NENESEL IMUNAISESEN DE



RAUN 1: Septemba 22 i go onal long Fraide 26.
RAUN 2: Oktoba long Monde 27 i go inap long Fraide 31.

BIABIA GO LONG WEWAK SEKIM OL DISTRIK OPISA LONG HAP...

AAH WEWAK! PLES BILONG PARADAI'S STRET!

WEWAK TO MAIPRIK! WEWAK TO MAIPRIK HAU'S DA WEDA AUTDE?!

NAU EM LAIK GO LONG MAPRIK NA EM KISIM REDIO NA SINGAIT IGO LONG SEKIM WEDA LONG HAP...

WEWAK TO MAIPRIK! WEWAK TO MAIPRIK HAU'S DA WEDA AUTDE?!

OH, DA WEDA AUTHIA IS WET & GRISI!

CRACK SWISS!

Planti bikhet pasin kamap long Bogenvil

HOMBRU o strongpela dring ol i mekim long ples yet i wok long kamapim moa sosel hevi insait long ol komyuniti long Bogenvil.

Bihainim dispela, askim i go nau long Bogenvil Trensisenel Gavman sapos loya bilong en inap lukluk long wokim wanpela lo bilong karamapim olgeta provins long daunim hevi bilong mekim, salim na dringim hombru. Na tu long daunim pasin bilong haitim na karim i go insait long ailan ol arapela strongpela dring long balus na sip.

Provinsal Plis Komanda Joel Kean i putim dispela askim bihain long hevi bilong hombru i go bikpela insait long ol ples long Buka Ailan. Ol hevi i sut long sosel sait we ol yangpela manmeri i wok long mekim nabaut long taim bilong danis, bihainim ausait pasin na brukim pasin kastam bilong ples, bagarapim ol yangpela meri na ol arapela moa pasin we i no stret insait long komyuniti na pablik ples.

Ol dispela samting i kamap na Mista Kean i stapim danis long Buka Ailan long las wik.

Mista Kean i tok bihainim ol hevi we i sut long sosel sait na bagarapim gutpela sindaun insait long famili na komyuniti taim ol manmeri i dringim hombru, ol sios, wimens grup na pablik i egensim tru

homburu. Olsem na em i putim askim nau long ol atoriti bilong mekim samting. Ol sios, meri na ol arapela grup long provins i no laikim tru pasin bilong mekim, salim na dringim hombru. Olsem ol i laikim ol atoriti long putim lo long daunim dispela hevi.

Long wankain taim, plis, ol sios, wimens grup na ol komyuniti lida long ples i wok long karimaut ol awenes program long ol samting nogut we hombru i ken kamapim long laip na sindaun insait long famili, ples, komyuniti na provins. Mista Kean i tok bikos long hombru, pasin bilong bagarapim meri, man i paitim meri na ol arapela, bagarapim ol samting na mekim nabaut insait long komyuniti i wok long kamap bikpela long Buka Ailan.

Olsem na em i stapim olgeta danis long ailan inap plis i ken kontrolim ol samting. Long wankain taim tu, wanpela meri NGO lida long provins i tok egensim strong pasin bilong wokim, salim na dringim hombru long provins.

Helen Hakena i tok hombru i daunim ol gutpela pasin bilong soim rispek insait long komyuniti na i kamapim moa hevi antap long dispela we pait long Bogenvil i kamapim.

Nesene kot long Buka we i kamap nau i gat 43ripot yet long harim we i sut long ol hevi hombru i kamapim.

Nesenel gavman bosim yet provinsel na LLG: Narokobi

SENIS insait long provinsel gavman sistem long kantri i stap aninit long lukaut na oda bilong nesenel gavman yet. Dispela em luksave Oposisen i tokaut long en.

Wanpela bikpela piksa Oposisen i luksave em long wok bilong Provinsel Tresera. Planti Provinsel Tresera i kisim oda i kam yet long nesenel gavman opis long Waigani.

Lida bilong Oposisen Bernard Narokobi i tokaut olsem dispela rifom sistem i kamap olsem wanpela bikpela paip bilong wara we i gat samting i blokim ron bilong wara insait long dispela paip. Dispela i ples kliia long nogat inap mani i go long provins, nogat inap opis bilong mekim wok, ol wokman bilong karimaut wok i nogat na arapela hevi moa insait long dispela rifom sistem.

Mista Narokobi i tok lokol gavman i wok long ol ples tasol kontrol, menesmen na papa bilong em i stap long nesenel gavman wantaim ol primia, gavana na provinsel gavman i nogat kontrol o pawa long go pas long lokol level gavman. Dispela i no stret tru, Mista Narokobi i tok. Olsem na ol Provinsel Tresera bai wet long kisim oda i kam long Waigani pastaim long ol i sainim na givim mani i go aut.

Mista Narokobi i tok sapos lain bilong em long Oposisen i kisim gavman, ol bai larim ol provins yet i kamapim lo bilong ol na ol bai stapim ol gavana long i no ken mekim wok olsem Spika. Ol i laik lukim bikpela pawa bilong mani i stap long ol provins, ol provins yet i mas holim bek bikpela hap, mani ol i kamapim long ol wok bilong ol long provins, ol mani bilong takis ol provins i pulim i mas stap bek long ol. Dispela inap givim strong long ol provinsel gavman long mekim plen na givim aut plen na wok bilong ol long sevim pipel.

Lida bilong Oposisen i tok sapos ol i kisim gavman, bai ol i rausim wok bilong Konstitusenele Rivi Komis (CRC). Palamen i gat tripela komiti grup. Konstitusenele Lo na Ekt komiti we ol i save kolim Jastis Komiti, Lejislesen Komiti we olgeta em palamen komiti na ol i mekim wankain wok tasol. CRC i kamap long givim moa wok long ol boi, olupela siaman i kisim pe na alawens wankain olsem ol minista na dispela i krangki na i abrusim lo.

Mista Narokobi i tok, nau olsem dispela kantri i sot tumas long mani, em i mas lukautim gut mani nau. Mipela i gat Lo Rifom Komis husat i mas kisim gutpela sapat na helpim bilong gavman long karimaut wok bilong em.

Mista Narokobi i mekim ol dispela toktok taim gavman bilong Bill Skate na Chris Haiveta i gat sampela hevi insait long em yet.

Ol lain bilong PPP i no amamas long Pangu Pati lida, Chris Haiveta na tu praim minista bikos sia bilong deputi praim minista em ol i strong long kisim.

PPP i sutim tok tu long Chris Haiveta long rausim sampela poin bilong toktok o Tems ov Referens bilong Komisn ov Enkwairi insait long hevi bilong Sandlain Kontrak.

Oposisen i luksave tu olsem dispela gavman i no bung gut yet bikos ol i no holim yet wanpela kabinet miting na ol yet i gat tok kros' namel long ol yet.

Mista Narokobi i tok long mekim dispela gavman i sana' gut wantaim, praim minista Bill Skate i mas givim sia bilong namba tu praim minista i go long Andrew Baing husat em lida bilong PPP. Bikos dispela em wanpela promis ol i bin pasim bipo long taim ol pati i bin laik bung na kisim namba bilong fomim gavman.

Saveman long bisnis mas harim Sandlain kot: Oposisen

YAKAM KELO i raitim

OL LAIN long Oposisen i gat strongpela tingting olsem wanpela man husat i gat save na ekspiens long wok bilong mani na bisnis i mas stap insait wantaim tupela jas bilong skelim kot bilong Sandlain Kontrak.

Lida bilong Oposisen Bernard Narokobi i tok gutpela long praim minista Bill Skate i makim pinis ol Tems ov Referens o ol poin bilong toktok long en long hevi bilong Sandlain. Tasol wanpela saveman bilong bisnis na mani i mas stap insait tu long komisn bilong harim kot ya long skelim wok bilong mani na bisnis insait long dispela kontrak.

Mista Narokobi i tok Oposisen i ting disisen bilong dispela komisn ov enkwairi bai bihainim tasol lukluk na pasin bilong lo. Bikos em ol lo man tasol bai harim dispela kot.

Oposisen i bin makim Baltatas Maketu, wanpela olupela seketeri bilong Difens na tu i bin seketeri long arapela dipatmen olsem wanpela man husat i ken sindaun insait long dispela komisn ov enkwairi. Tasol praim minista i

lukdaun long dispela askim bilong Oposisen.

Mista Narokobi i tok Tems ov Referens bilong gavman i no bihainim gut wanpela stretpela oda. Ol poin bilong toktok i stap nabaut. Mipela i kamapim 28 Tems ov Referens olgeta na olgeta i sut stret long olgeta eria we i banisim dispela Sandlain Kontrak, Mista Narokobi i tok.

Oposisen i laikim bai namba tu praim minista Chris Haiveta i mas lusim sia bilong em na stap ausait long wetim kot bilong Sandlain Kontrak. Na dispela bai givim rum long lida bilong PPP Andrew Baing long kamap namba tu praim minista.

Oposisen i ting Chris Haiveta i gat nem long dispela kot bilong Sandlain olsem na em i mas lusim sia na wetim kot bilong em.

Oposisen lida i tok ol tingting olsem Chris Haiveta i asua long kontrak bilong Sandlain o em i no asua long wanpela samting, i no asua bilong em i mas lusim sia bilong em na stap aut. Bikpela samting em long larim dispela komisn ov enkwairi long mekim kliia olgeta samting pastaim orait ol lida husat i no asua long wan-

pela samting i ken statim gut wok bilong em.

Dispela askim bilong Oposisen tu i no bin karim kaikai bikos praim minista Bill Skate i no laik larim Chris Haiveta i lusim sia bilong em. Mista Skate i tok Mista Haiveta i nogat wanpela asua yet long wanpela samting. Na olsem em i mas stap yet long wok bilong em na mekim wok i go inap kot bilong Sandlain i tokaut tru sapos em i gat asua o nogat.

Praim minista i makim pinis Jas Kubulan Los long go pas long harim dispela kot bilong Sandlain Kontrak. Na dispela bai namba tu taim bilong kamapim dispela kot gen aninit long Jas Los.

Namba wan kot bilong Komisn ov enkwairi em Jas Andrew Warwick i bin harim long mun Me. Tasol planti saveman i tok, dispela komisn i no karamapim planti samting insait long wok painimaut bilong Sandlain Kontrak.

Praim Minista Mista Skate long dispela taim i tokaut olsem nupela Tems ov Referens o ol poin bilong toktok em i kamapim bikpela na i karamapim planti hap na eria bilong lukluk long en insait long kontrak ya.

Dispela komisn ov enkwairi tu bai glasim ol arapela kontrak na bikpela projek olsem Kens POSF haus, Nu Briten Oil Pam, Orogen sea, Mosbi wara kontrak, Ramu Madang rot projek na arapela bikpela wok na projek tu insait long kantri.

Dispela Komisn ov enkwairi we praim minista Bill Skate i makim pinis bai mekim wok painimaut bilong em i go inap long mun Oktoba. Taim em i pinisim olgeta wok painimaut bilong em, bai em i givim ripot i go long palamen bai ol memba i ken harim long Novemba taim palamen i bung.

Oposisen lida Bernard Narokobi i tok wanpela samting tu Oposisen i laikim long i mas kamap em long rot bilong kotim man o lida long kisim taim sapos komisn ov enkwairi i painimaut olsem wanpela lida i asua long ol samting.

Mista Narokobi i tok ripot bilong Komisn ov Enkwairi i noken pinis nating. Gavman i mas salim ripot bilong Komisn i go long Fraud skwat o Ombudsmen Komisn na Pablik Prosekjuta long karimaut wok bilong kotim man husat i gat evidens long kamapim ol asua.

Warangoi rot i op pinis



• Long lephan i go long rait em Siaman bilong Gasel Restoresen Atoriti Sir Henry ToRobert, Namba 2 Seketeri bilong AusAID Ms Josephine Hutton, na Is Nu Briten Provinsal Woks Menesa, Hans Sarua. Ol i holim sisos na redi long hatim ribin long opim Warangoi rot. Poto na stori i kam long Ostrelia Hai Komisn.

WARANGOI rot long Gasel eria bilong Is Nu Briten, em gavman bilong Ostrelia na Papua Niugini i putim moni wantaim long wokim i pinis, na redi nau long yusim.

Dispela rot i kamap aninit long wok bilong stretim ol bagarap em i bn kamap long Gasel eria. Siaman bilong grup, Gasel Restoresen Atoriti (GRA), Sir Henry ToRobert, na Namba 2 Seketeri bilong AusAID long Is Nu Briten provinsal gavman, Ms Josephine Hutton i opim dispela rot long Fraide Julai 25.

AusAID em wanpela bikpela grup bilong Australia gavman husat i helpim long givim development wok insait long PNG, na ol arapela Pasifik Ailan kantri.

Wok bilong Warangoi rot i kos moa long K1 milien. Na longpela bilong rot ya em moa long 8 kilomita olgeta. Wok bilong kamapim gut Warangoi rot em wanpela bilong planti wok AusAID i sapatim wantaim mani long kirapim gen Gasel eria bihain long ol bagarap bilong maunten paia.

Dispela nupela rot bai givim bikpela helpim stret long ol pipel, bikpela long ol dispela husat i muv i go stap nau long gutpela eria long abrusim maunten paia long bihain taim.

Rot i joinim tu nupela Warangoi Hai skul, we bai pinis long 1998. Hai skul i kamap tu aninit long dispela helpim wok bilong AusAID na PNG gavman.

Wok bilong stretim gen Gasel bai karamapim tu wok bilong stretim gut Clifton, Sikut na Vunapope rot, wantaim tu ol liklik rot long Bailu rurel eria, we i go bungim ol nupela setelmen eria na bikpela Kokopo rot.

Nupela plis opis o stesin bai kamap tu long Kokopo, wantaim haus slip bilong ol plisman long Baliora. Tupela wok ya bai kamap tu aninit long dispela plen bilong stretim gen Gasel eria.

Long putim olgeta wantaim, wok bilong stretim gen Gasel i kisim moa ong K30 milien i kam long AusAID, na K174 tausen i kam long PNG gavman.

Planti i nominet long Not Wagi

WANPELA man bihain tasol long nesenel ileksen i go pinis, ol pipel bilong Papua Niugini i redi nau long go insait long lokol level gavman ileksen. Nominesen inap pas long las wik Fraide tasol ileksen Komisn i skurim i kam antap inap dispela Fraide 18. Ogas

Long Not Wagi sok o fivs bilong dispela lokol level gavman ileksen i kisim olgeta manmeri na pikinini pinis. Taim planti manmeri long ples na komyuniti i wok long lukluk long painim ol gutpela man long makim, ol planti yangpela man na olupela kaunsel i kempein na tromo mani pinis long nominetim ol yet.

I gat 26-pela kaunsel wods long Not Wagi lokol gavman kaunsel na bihain long ileksen bai i gat 26-pela kaunsolas tasol. Nau yet taim nominesen op 300 kendidets i nominet pinis. Long Mande Asisten Ritening Opisa bilong Not Wagi Mista Fred i tokim Wantok olsem dispela em bikpela namba moa long ol kendidets i winim tru ol arapela kaunsel ileksen bipo.

Mista Hoan i tok tu olsem long dispela ileksen i gat planti ol yangpela na saveman i sanap resis tu. Tasol Mista Hoan i tok moa i luk olsem planti moa bai kamap long nominet bihain long ilektoral komisn i sukurim taim i go antap moa.

Nau yet planti ol kendidets raun kempen pinis long kisim o vota bilong ot. Wantok ripota long hia i panim aut olsem dispela kaunsel ileksen long hia bai i go tait olgeta bikos bihain tase long nesenel ileksen sapat bilong wanwan kendidets laik tra'im strong bilong ol na lukim olsem sapos ol i sat sapat star yet o nogat.

TUPELA man i wokabaut i go long strit bilong wanpela bikpela taun. Wantu wanpela man i sanap i stap na i lukluk long poroman bilong em na i tok, "E, poro, yu harim krai bilong liklik palai i stap insait long haus ya?"

Narapela man ya i kros liklik na skim. "Olsem wanem na yumi tap harim krai bilong liklik palai na insait long taun, we i gat krai bilong ol pipel na ol ka na ol tep koda bilong ol disko?"

Nau poroman i bekim tok olsem: Ating tok bilong yu i tru, tasol mi save wok insait long DPI na dipatnen bilong mi i save sekim ol liklik animal na binatang. Olsem na mi save gut long krai bilong ol liklik palai bilong haus. Mi inap harim longwe. Yu save bilong wanem? Bikos mi laikim dispela krai. Em i go bilong yumi olgeta manmeri: yumi save harim gut ol krai swit long yau bilong yumi. Orait bai mi soim long yu nau."

Orait, man ya i kisim wanpela 20 toea mani na tromoim i go daun long simen. Wantu 7-pela pipel i tanim het i go long ples we mani pundaun. Watpo? Ating bikos ol i wari long mani, o ol i gat interes long mani. Orait, dispela


TU NIMIT TINGTING PUTIM YAU LONG TOKTOK BILONG GOD

krai bilong mani i pundaun em i swit long yau bilong ol. Oltaim ol i redi long dispela kain krai na nois.

Olsem tasol yumi wan wan i save harim samting yumi laikim. Olsem tasol na mama inap harim krai bilong bebi bilong em, maski i gat planti nois nabaut long em.

Long wankain we tasol yumi inap harim God sapos yumi putim yau. Sapos yumi askim ol save-man olsem: prea em i wanem samting? Ol bai tok: "Prea em i min yumi toktok long God." Nogat. "Yumi toktok wantaim God." Em i min yumi save toktok na tu yumi save putim yau long em. Sampela taim em i tok, sampela taim yumi tok. Oke. Tasol askim bilong mi i go olsem: Wantaim yumi save putim yau na harim God i tok long yumi? Ating em i laik tokim yumi wanpela samting, tasol yau bilong yumi i no op long em.

Long taim yumi mekim lotu wantaim planti singsing na pre wantaim, ating God i no save toktok



FRANK MIHALIC i raitim

wantaim yumi. Taim yumi paitim han na paitim gita na singaut aleluya - ol dispela samting i save onaim God. Tasol ating God i no save toktok wantaim yumi long kain taim olsem. Bilong harim toktok bilong God yumi mas sindaun isi na pasim ai na opim yau.

I gat wanpela naispela stori long Olpela Testamen long 1 King 19:12. Profet Aisaia i wet long God i mas kam visitim em. Pastaim wanpela guria i kamap, tasol God i no kam. Nau wanpela raunwin i kam, tasol God nogat. Nau klaut i lait na klaut i pairap, tasol God i no kamap. Nau wanpela liklik win tru i kamap na i meknaisim ol liklik lip bilong tri. Nau God i kamap. Em nau?

Yumi mas givim spes na taim bilong harim toktok bilong God. Ating yumi ken kam bipotaim liklik long Sande, na sindaun isi na pasim ai na larim God i toktok long yumi. Tru tumas, bai yumi painimaut olsem, God i gat tok long yumi. Long olgeta de long taim yumi kirap long moning-taim, sapos yumi sarap inap faiv minit tasol na putim yau long God, bai God i blesim na stiaim dispela de.

Ating yu bin lukim pasin bilong wan wan pailot long ples balus long taim em i redim balus long flai

i go. Pastaim em i sekim tang bensen, nau em i kikim ol taya na em i muvim tel bilong balus i go i kam. Nau em i kalap na i sindaun long rum draiva na kirapim ensin. Nau em i opim wales bilong em na i toktok wantaim man i stap long tawa. Man ya bai skulim em long wanem kain win na klaut em bai painim long rot. Bihain pailot i kisim save pinis, orait, nau tasol em i flaim balus i go antap.

Yumi mas bihainim pasin bilong dispela pailot. Long bigin bilong wan wan de yumi tu i mas putim yau long tok bilong man i stap long tawa - em God tasol. Em bai stiaim yumi gut long dispela de.

Long olgeta de planti tingting i save kamap long yau bilong yumi. God i bin givim wanpela maus na tupela yau long yumi olgeta. Ating em i laik bai yumi mas kisim tok planti taim na autim tok liklik taim tasol.

Long Sam namba 135, David i lap long ol god ain na ston na i tok: "Ol i gat yau tasol ol i no inap harim wanpela samting."

Na Jisas i bin tok olsem: "Ol pipel i save putim yau, tasol ol i no save harim tok na kisim save." (Mat 13:15).

Watpo famili na prea laip i bagarap?

WAT planti famili i bungim ol wankain hevi long dispela taim. Planti marit i bruk. Ol pikinini i no gat klos, kaikai na haus bilong slip. Pasin bilong paitim toktok na painim rot bilong stretim hevi long famili laip. No gat spek na bel isi i stap ples ples. Na ol famili i no moa bung na beten wantaim.

Watpo sua i stap we? Vicar General bilong Angliken sios long Mosbi Asdaiosis pater Koieba i autim sampela tingting bilong em long dispela samting.

"No gat wanpela ogenaisiesen maski em i wanem kain inap stap na go het long mekim wok sapos i no gat spirit bilong wok bung wantaim na i no gat oda. Olsem tasol man em ol het bilong famili," pater Koieba i tok. Em i tok, long baibel tok 'het' i min olsem man i gat otoriti. Tasol insait long famili laip dispela i no min man i moa antap na spesel moa long meri. No gat man na meri i wankain long ai bilong God.

Pater Koieba i tok, taim God i tok olsem man em i het bilong meri God i no tok long save, o husat i gat namba. No gat. God i toktok long wanem kain wok husat i gat insait long famili laip. Man i gat wanem kain wok. Meri i gat wanem kain wok. Na ol pikinini i gat wanem kain wok.

Em i tok man i gat wok bilong mekim olsem papa bilong famili na meri tu i mas mekim wok olsem mama bilong famili. "Sapos man i mekim olsem na meri i mekim olsem, oltaim ol famili bai i amamas," em i tok. Pater Koieba i tok sapos i gat planti man i laikim meri bilong ol na i karim pen long soim meri bilong ol olsem ol i laikim ol na mekim planti gutpela samting bilong sapotim ol wantaim bel bilong ol olgeta na givim ol yet olgeta long ol meri bilong ol ating sindaun bai kamap gutpela. "Mi bilip sapos ol man i mekim olsem, ol meri tu bai harim tok bilong ol man na luksave


long ol olsem ol i het bilong famili," pater Koieba i tok. "Ol papamama na ol pikinini bai stap hepi. Ol bai ekseptim ol yet, rispektim narapela narapela olsem papamama na pikinini. Bai i gat bikpela fridom bilong toktok na autim tingting na wari insait long famili," em i tok. Pater Koieba i tok taim ol famili i painim isi long toktok namel long ol yet, na serim ol samting wantaim, pasin bilong toktok wantaim God tu bai kamap ples klia.

"Wanpela taim wanpela save-man i tok, 'larim mi lukautim pikinini bilong yu inap long 7-pela yia na mi no wari long wanem samting yu mekim long em bihain long dispela,'" pater Koieba i tok. Em i tok dispela i min olsem, wanem samting pikinini i lainim insait long namba wan yia i go inap long 7-pela yia bai i stap insait long tingting bilong em inap em i dai.

"Long dispela as," pater Koieba i tok, "ol papamama i mas stap wantaim gut na laikim ol yet. Ol i mas tisim ol pikinini long toktok long God long prea taim ol i yangpela yet." Em i tok taim ol pikinini i abrusim 7-pela krismas na i gro i go bikpela ol i no inap lus tingting long wanem ol gutpela samting ol i lainim taim ol i stap liklik yet. "Ol gutpela pasin ol i lukim, harim ol mekim wantaim famili bilong ol bai kamap ples klia insait long laip bilong ol taim ol i gro. Na dispela i ken kamapim gutpela sindaun long laip bilong ol," em i tok.

Pater Koieba i tok, traim askim pikinini husat i kam long dispela kain famili, 'God em i husat?' na yu no inap abrus long harim ol pikinini i tokim yu olsem God i mekim heven na graun. Em i laikim yumi na i lukautim yumi. God i stap na i harim prea bilong yumi na ol kain bekim olsem. Pater Koieba i salensim ol marit long bihainim ol dispela skul bilong kamapim gutpela sindaun.

Singaut i go long ol lokol pater i wok bung wantaim



• Ol daiosisen pater bilong PNG holim ritrit long Alexishafen, Madang.

WENCESLAUS MAGUN i raitim

VICAR General o pater i wok olsem namba tu bilong bisop long Madang Asdaiosis, pater Gregory Tiani i singautim olgeta lokol pater bilong Papua Niugini long wok bung wantaim.

Pater Gregory i mekim dispela askim bihain long Katolik Bisops Konferens (KBK) i makim em olsem mausman bilong ol pater bilong PNG insait long wanpela (KBK) miting long dispela yia. "Dispela kain asosiesen i bin stat long pinis bilong 1980 tasol i slek pinis," pater Gregory i tok.

Em i tok as tingting bilong dispela asosiesen em bilong strongim wok bung wantaim namel long ol lokol pater bai ol i ken sanap strong na mekim gutpela wok insait long lokol sios. Pater Gregory i tok dispela asosiesen i ken helpim ol lokol pater long glasim ol bikpela hevi nau i wok long kamap ples klia insait long ol famili, sosaiti, na kantri we i wok long bagarapim sindaun na laip bilong ol pipel. "Mipela i hop wantaim dispela kain asosiesen mipela i ken painim rot bilong stretim ol hevi long PNG

olsem ol lokol pater. Wanpela bikpela astingting tru bilong dispela asosiesen em bilong helpim ol pater long serim ol wok na hevi bilong ol yet na strongim bilip bilong ol pater bilong sanap strong na go het long mekim wok," pater Gregory i tok.

Pater Gregory i tok kain ol hevi olsem pait long Bogenvil, kontrak bilong baim ol praivet ami bilong Sandline o ol hevi bilong ol yut i no gat wok na i kisim spak brus o mekim stil pasin na ol arapela hevi PNG i bungim em ol pater inap painim rot bilong stretim sapos ol i wok bung wantaim. "Mipela i ken strongim dispela wok long nesenel, rijinel, na i go inap long daiosis na peris level sapos mipela ol pater i wok bung wantaim. Dispela i ken soim spak piksa long ol pipel bilong mipela olsem mipela i wanpela pipel bilong God na tu mipela i kam long wanpela kantri," em i tok.

Long strongim dispela asosiesen pater Gregory i tok ol inap mekim ol samting olsem holim ol ritrit, kisim skul, holim ol woksoy na konferens, senisim na serim ol program. "Kain olsem pater bilong Bogenvil i ken go wok long narapela daiosis long PNG

na larim narapela pater bilong dispela daiosis i go kisim ples bilong en," em i tok. Pater Gregory i tok nau yet ol lokol pater i no mekim dispela na sios olsem wanpela bodi bilong Kraisi wok long karim pen. Em i tok pasin bilong serim na senisim ol program o go helpim narapela pater long peris na daiosis i ken strongim tru wok bilong lokol sios. "Mipela i no mas go long narapela kantri o singaut long helpim long sios long narapela ol kantri sapos mipela i wok bung wantaim," pater Gregory i tok.

Em i tok wok bilong kamapim dispela asosiesen i stat pinis. "Mipela i raitim pinis sampela askim bilong salim i go long ol pater na kisim tingting bilong ol," pater Gregory i tok. Wantaim ol tingting bilong ol pater ol bai kamap wantaim wanpela plen bilong mekim tru dispela wok.

Pater Gregory i askim tu ol le manmeri long helpim ol pater wantaim ol gutpela stia tok. "Ol le manmeri i ken givim mipela ol gutpela edvais tasol em i wok bilong mipela ol pater yet long skelim ol dispela na yusim gut long laip bilong mipela," em i tok.

Pater Lak i sanap long helpim pipel

...lewa bilong em i stap long ol turangu lain

EDDIE SAUNDERS i raitim

GAVANA bilong Westen Hailans, Pater Robert Lak i tok em bai sanap strong long helpim ol manmeri na pikinini long ol ples na bikbus insait long Westen Hailans Provins. Pater Lak i tok lewa bilong em i stap long ol turangu pipel husat i no gat gavman sevis, rot, bris, haus sik, na skul na liklik rot bilong mekim bisnis na kisim mani.

"I gat planti ples insait long Westen Hailans i no gat ol gutpela sevis bilong kamapim gutpela laip. Na mi laik dispela ol ples i mas kisim sevis pastaim long ol dispela i gat pinis," Pater Lak i tok.

Em i tok em i luksave long ol turangu manmeri pinis taim em i mekim wok raun olsem wanpela pater na olsem em bai mekim olgeta samting long helpim ol long dispela taim olsem Gavana bilong provins. Pater Lak i tok tu olsem em bai strongim olgeta wok olpela Gavana, Paia Wingti i mekim

bilong kirapim ol skul na wok bisnis. Tasol wanpela bikpela tingting bilong em nau em bilong glasim na stretim pablik sevis long provins. Em i tok em bai rausim ol pablik seven i no mekim wok bilong ol olsem ol i sapos long mekim.

Pater Lak i tok em i laik lukim ol wokman bilong gavman i helpim ol pipol na i no tingim ol yet. Em i lukluk tu long ol saveman i kisim na holim ol wok long opis bai ol i ken mekim gut wok.

Wantok i kisim tu wanpela pas i kam long Pater Paul Kanda na i tok sori i go long Pater Lak na Pater Ambane. Pater Kanda i tok em i no laik bagarapim nem bilong tupela wanwok bilong em. Tasol em i tok em i givim tupela bikpela sapat na bai amamas long wok bung wantaim tupela.

Pater Kanda i tok: "I tru sios i nidim mipela ol pater moa yet, tasol sios em husat na politik em husat. Na tupela i sevim husat? Sapos sios na politik sevim pipol bilong dispela kantri, orait, na long las ileksen ol pipol bilong tupela provins. Simbu na Westen Hailans i bin tok inap em inap na makim Fr. Lak na Fr. Ambane."

Wantaim dispela em i tok sori na i no hamamas long tok i no kamap stret long Wantok pepa



Ol mama i wok hat tru... • Dispela em ol mama

bilong SDA sios bilong Gordons, 8 mail na Erima husat i bin bun long Gordons klinik long kinim. Dispela wok ol i bin mekim em i olsem wanpela program bilong ol long helpim komuniti insait long siti. program ya ol i kolim Dorcas Welfare komuniti em i bilong ol mama bilong SDA sios we ol i save wokim ol samting we ol komuniti i save yusim ol sem haus sik na ples bilong ol turangu. Nes husat i lukautim Gordons klinik i tok olsem dispela kain program bilong ol mama i gutpela stret bikos ol nes yet i save bisi tumas long lukautim ol sikman na ol i nogat taim long kinim ples ya. Foto: Ivan Bayagau.

Lens dipatmen i mekim moa mani insait long 6 mun

MINISTA bilong graun, Viviso Seravo i tokaut olsem dipatmen bilong em i mekim planti mani long sotpela taim. Na i luksave tu olsem ol i no kisim inap sapat mani long gavman.

"Dipatmen bilong mi i kalap i go antap long 70 pe sen mak bilong kisim mani insait long ol pes siksapela mun long dispela ya. Na dispela i no wankain olsem long wankain taim long las ya," Mista Seravo i tok. Em i tok dispela i soim olsem dipatmen bilong en inap kamap wantaim mak bilong K18 milion we dipatmen bilong Fainens i laikim ol i mekim.

Tasol Mista Seravo i tokaut tu olsem em i no amamas long gavman bikos ol i no bin sapatim dispela dipatmen long mani. "Mani gavman i save givim bilong ronim dispela dipatmen em i no inap tru. Olsem na

mi bai mekim wanpela sabmisen i go long kabinet na askim ol long givim mani long dipatmen insait long foa mun foa mun na maski long wan mun tasol," Mista Seravo i tok. Em i tok bikos long dispela hevi, dipatmen i bin painim hat long mekim ol wok bilong en na karim aut ol program.

Mista Seravo i tok strong long kamapim tu wanpela gutpela nesanel polisi long glasim ol hevi bilong ol setelmen long ol siti na taun. Em i tok wanpela we bilong mekim dispela em long brukim ol setelmen i go long ol liklik sabdivisen bilong ol setelmen i stap pinis olsem bai ol inap givim ol taitel. Nau yet dipatmen bilong em bai wok klostu wantaim Nesanel Kapitel Distrik Komisen na ol narapela atoriti long ol provins long glasim dispela hevi na painim rot bilong stretim.

Katherine Mal bai kot long sia bilong Madang Open

MERI i go pas long Women and Youth In Development (WYID) Katherine Mal bai kot long winim Madang Open sia. Em bai kot wantaim Memba bilong Madang Open na Minista bilong Jastis, Jacob Wama olsem namba wan 'defendant' na Iektorel Komisen olsem namba tu 'defendant'.

Mis Mal husat i kamap namba tu insait long sia bilong Madang Open long jenerel ileksen wantaim 2119 vot long Jacob Wama husat i win wantaim 2232 vot i tok em bai bringim Wama na iektorel komisen i go long kot sampela taim long Septemba bihain long ol loya bilong en i stretim olgeta pepa wok.

Mis Mal i bilip olsem sampela paul samting i bin kamap insait long taim bilong vot we em i no laik

long tokim Wantok long ol. Tasol em i bilip em i gat inap as tingting bilong bringim ol dispela samting i go long kot.

Mis Mal i tok ol hevi em i bilip i no stret em olsem planti ol vota bilong en husat i gat nem insait long 1992 komon rol i no bin vot long wanem nem bilong ol i no bin stap insait long 1997 komon rol. Mis Mal i tok planti ol sapota bilong em long Sanepi ples long Not Kos na sampela ol ples insait long Saut Ambenob na long Not Ambenob tu i no vot. Moa yet, em i bilip sampela ol sapota bilong sampela kendidet i bin vot planti taim. Em i tok em i gat bilip tu olsem sampela iain husat i vot long dispela ileksen i no bin winim taim long Madang olsem lo i tok tasol i bin vot. Long dispela as, Mis Mal i tok em i no

inap ekseptim win bilong Mista Wama inap kot yet i tokaut long husat tru i win. "Sapos kot i tok olsem Mista Wama i win, orait bai mi welkamim em na wok bung wantaim em," Mis Mal i tok.

Em i tokim Wantok olsem planti ol sapota bilong en i askim em long bringim dispela hevi long kot na olsem em i mas mekim long givim bel isi long ol lain i givim em bikpela sapat. Mis Mal i tok planti ol meri i bin wok hat long bungim mani bilong baim kot bilong en olsem na em i no inap givap long kot.

Long wetim disisen bilong ol loya bilong en. Mis Mal i tok em ba-traim resis tu long sia bilong kaunsel na bilong kaunsel presider sapos em i winim ileksen bilong kaunsel.

Bai wasim gut long kol wara



Sakias kisim TokStret i go long Bogenvil

PAMUK pasin, pasin we papa i silip wantain pikinini, sik AIDS na ol narapela trabel i kamap wantaim nom bru bai stap long lis bilong ledro wokmeri Kathleen Sakias taim em i raun long Bogenvil long motkasim program bilong YWCA Tok Stret

BARBARA MASIKE
raitim

Tok Stret em i wanpela program YWCA i kirapim long givim infomesen i go long ol pipel olsem ol grasrut husat i no save gat sans long kisim gutpela infomesen

Dispela program i save kamap and ol funde na Fonde long Karai em na i gat narapela hap bilong em i save kamap long nuspepa

Ms Sakias tokaut olsem em bai go long Bogenvil long Ogas 16. Dispela toktok em i bin autim long funde long dispela wik taim YWCA i masim dispela program bihain long em i go het long samting olsem dispela mun nau. Tok Stret i bin stat long Jenuer long stat bilong dispela yia

Ol narapela samting Ms Sakias bai lukluk klostu long ol long Bogenvil em long pis nawanbel nau i wok long kamap long provins na ol sevis olsem helt na edukeson we i

sot tru long Bogenvil long dispela taim.

Tok Stret i bin kamap olsem hatwok bilong ol meri long YWCA yet olsem eksekutiv dairekta Sandra Chestnutt na Ms Sakias.

Namba wan tingting bilong dispela program em long kiam ol pasin bilong toktok namel long ol bikman meri na ol yangpela bilong tude.

TokStret em i gutpela long kirapim ol toktok namel long ol papamama wantaim ol pikinini bilong ol long ol palnti isu bilong tude.

Ol narapela topik dispela program i bin autim pinis em long famili plening, humen raits, ol yangpela meri i bel, developmen, lidasip, korapsen na ol planti narapela samting bilong toktok.

Ol man husat i save toktok long dispela program save kam long ol kain hap olsem ol NGO, gavman, Yunivesiti na ol narapela ogenasesen.

UNFPA (United Nations Fund for Population Activities) i givim samting olsem K131,636 long ronim dispela program long wanpela yia. Sapos dispela yia i pinis ol lain bilong YWCA na ol UNFPA bai sindaun ken long lukluk long we ol mani i bin wok.

Ol stilman bilong Daru go stil long Australia

Ol stilman bilong Westen provins i brukim boda bilong Papua Niugini na i go long wanpela ailan long Australia we ol i brukim wanpela stoa na stilim mani wantaim bensin dram.

IAN KAKARERE
i raitim

Samting olsem 6-pela man bilong ples Mabuduwan klostu long Daru i bin go long

Saibai ailan insait long Tores Strets long Not Kwinslen long wanpela dingi long Julai 10 na mekim dispela stil pasin. Ol i brukim wanpela bak stoa, stilim sef na foa 20 lita dram bensin bilong spit bot. Ol i kisim ol dispela samting i kam bek long PNG. Ol wokman bilong Kwinslen Atoriti long Thursday ailan i toksave pinis long ol plisman bilong Daru long dispela samting.

Plis long Daru i mekim wanpela wok painim na i kisim samting

olsem \$1081 dola mani bilong Australia long wanpela wara klostu long Mabuduwan ples. Ol plisman i holim pinis 5-pela man ol i ting i bin mekim dispela stil pasin. Wanpela bilong ol dispela stilman, i ronawe yet.

Plis long Daru i tok, ol i bin holim pas sampela bilong ol dispela stilman long Papua Niugini Benking Kopresen (PNGBC) long Daru taim ol i bin go traime long senisim ol dispela mani.

Nau yet ol plisman bilong Australia i kam pinis long Daru na paitim tok wantaim plis long Daru na PNG gavman inap ol dispela stilman i ken go sanap long kot long Australia. Wantok i no inap kisim toktok bilong Siv Inspekta John Anawi long Daru long dispela.

Long Kiunga ol plisman i wok long painim yet tupela man ol i ting i bin stilim K60,00 bilong Progressive Traders supamakot

long Julai 28.

Siv Inspekta Taibu Ako i tok em i bin tokim ol plisman bilong en long putim poto bilong ol dispela tupela man ol i ting i mekim dispela stil pasin long pes na notis bod bilong olgeta stoa na long ol pablik ples. "Mipela i mekim olgeta samting mipela inap tingim bilong holim dispela tupela man tasol i kam inap tude, mipela i no painim ol yet," Mista Ako i tok. Em i tok ol i save long dispela tupela man, ol famili bilong ol na ples bilong ol. Mista Ako i tok ol i bilip dispela tupela stilman i kam long ples Awin insait long Kiunga distrik.

Plis i tok, wanpela wokmeri bilong Progressive Traders i bin lusim stoa na i laik go long hap-sait haus we Wes Pac bank i stap bilong putim dispela K60,000 taim tupela stilman i bin hensapim em na ronowe wantaim dispela mani.

Ol bagarap na hevi i kamap

SAMPELA hap bilong kantri i bungim hevi long dispela taim long taim nogut we strongpela kol bikpela ren na taitwara, bikpela solwara, paia na nogat ren i kamapim

Olsem na Nesenel Disasta na Imesensi Sevis (NDES) i askim long helpim bilong tram stretim ol pipel we hevi bilong naturel disasta i bagarapim ol

NDES dairekta Leith Anderson i tok samting olsem 30 000 pipel long Tambul Nebiyer distrik insait long Sauten Hailens i kisim taim nogut long bikpela kol i bagarapim ol gaden kaikai na ol haus long las wiken

Mista Anderson i tok long ples Kup insait long Westen Hailens; paia i kukim gras bikos long dispela hap, nogat tren i pundaun long longpela taim na ples i drai olgeta

Ol ripot we i kam long Sauten Hailens i tok sampela hap paia i wok long go het yet na bagarapim gras, ol diwai na ol haus. Bihain long faivpela de paia i go het yet na i kukim pinis bikpela eria na ples bilong kisim wara long en i drai olgeta. Paia i bin stat klostu long Pela Pagazer watafol, ol ripot i tok.

Hevi long nogat ren we i kamapim wara i sot i karamapim planti hap bilong Sauten Hailens olsem Koroba/Kopiago, Tari, na Komo/Magarima. Ol wara i klostu drai olgeta long dispela taim.

Wanpela komyuniti lida long eria i tok strong long ol pipel bilong noken mekim paia.

Mista Anderson i tok ripot long Bogenvil i tok bikpela ren na taitwara i bagarapim nau ol pipel bilong Buin na Siwai long Saut Bogenvil.



Taim bilong soim stail

• Ol manmeri bilong Wabeg i bilas gut tru long welkamim Hai Komisina bilong Australia Bill Farmer long dispela yia.

Biksolwara birua long ol turis

WOK painim long tripela pipel husat i lus long solwara insait long Wes Nu Briten i go het yet. Tasol bikpela solwara i kamap na long aste, ol atoriti we i wok long mekim dispela wok painimaut i bin slek liklik na wetim gutpela taim i kamap.

VERONICA HATUTASI
i raitim

Ailans Plis Divisenel Komanda Inspekta John ToGuata i tokim *Wantok Niuspepa* olsem plis na ol lokol pipel nau i karimaut wok long painim tupela

turis bilong Japan na wanpela yangpela man Hoskins husat i lus long solwara long Hoskins long taim dingi ol i stap long en i kapsait long Sande.

Em tok bikpela solwara i mekim birua ya i kamap. Tupela turis bilong Japan em wanpela man na narapela em meri. Man Hoskins em opereta bilong dingi we i wok long karim ol Japan turis i go sua long Hoskins bilong mekim wok daiving long provins.

Ol ripot long provins i tok tupela Japan i stap insait long grup bilong

13-pela turis bilong Japan we Ai r Niugini i lusim ol long Kimbe long las Sande bilong stap insait long wanpela wok bilong daiv insait long solwara bilong Wes Nu Briten bikos provins i gat ol naispela hap bilong daiv long em long kantri.

Bot MV Explorer, wanpela sip long karim ol lain i laik go daiving i bin karim ol tasol em bin gat hevi long ensin taim ol i lusim Hoskins bris na olsem ol bin salim narapela liklik bot long helpim ol. Tasol taim bot i wok long karim ol go long nambis, bikpela solwara i kapsaitim

bot na ol pasindia wantaim. Sevenpela Japan i bin stap insait long en we tupela i lus yet na wanpela man Hoskins husat i operetim bot wantaim.

Inspekta ToGuata i tok Niugini Ailans rijon i stap kwait na nogat meknois i kamap insait long dispela wik.

Is Nu Briten tasol i bin ripotim ol liklik trabel bilong brukim stoa na stilim ol samting long las wiken tasol inap long las Fraide i kam long nau, olgeta faivpela ailan provins i stap orait tasol.



Yusim Gut Ol Risoses Bilong Yu

SAVE, EKSPIRIENS, INTERES

Planti bilong yupela i gat kain kain save, ekspiries na interes long mekim ol samting na salim. Salim kaving em wanpela gutpela piksa bilong dispela bisnis.

Ol arapela em, wokim basket, bilum, mat, sospen, katim gras, kukim kaikai, salim skon na arapela moa. Ol dispela kain bisnis em isi long statim bikos yu ken statim long haus bilong yu. Bikos ol manmeri i gat ol risoses bilong statim dispela kain bisnis na tu ol i no inap tromoi planti mani long statim dispela wok. Bikpela samting em long yu yet i mas skelim na glasim yu yet sapos yu gat save na ekspiries bilong mekim dispela samting bilong salim long ol kastoma long gutpela prais na pulim inap profit bilong sapatim yu na famili bilong yu.

EKSPERIENS NA EDUKESAN BILONG YU

Ekspiries na save bilong mekim samting i save kamap long ol lain husat i bin mekim dispela wok long sampela taim pinis long bipo wantaim ol arapela bisnis. Na dispela save o ekspiries i save pusim man long statim bisnis we inap wok na ron gut long wanpela yia. Ol lain i statim ol kain bisnis i save gut tru long wanem kain masin o ol samting bilong yusim long wok wantaim long mekim wok. Ol i save long kos na prais bilong ol dispela samting na saplai bilong ol. Na tu ol i save long maket bilong ol. Ol i save olsem ol yet i ken mekim gutpela wok taim ol i ronim wok bilong ol yet.

BIKPELA SAMTING INSAIT LONG DISPELA LIKLIK BISNIS ONASIP EM

- lainim na klia gut long wok bilong bisnis i ron olsem wanem.
- wanem rot ol inap wokim samting na wanem rot ol i save givim sevis.
- long lainim na save long ol kain kain rot bilong mekim wok, menesim na maketim bisnis.

Arapela Risos bilong Yu: Planti lain, ol i gat bikpela haus we ol i no yusim olgeta. Dispela em ol i ken senisim i go olsem liklik stua, bekeri, kai ba, o ripea stua. Yu ken renting ekstra ka bilong mekim wok long wokim PMV bas o yusim long karim ol kago na samting bilong bisnis i go salim.

I gat wok fu long sampela hap graun yu no yusim. Bikos wanem samting i kamap em bilong kaikai. Arapela wok bilong en em; lukautim sipsip, kau, banis kakaruk na banis pik.

Ol masin i bilong mekim wok bilong kamapim samting. Sapos wanpela hap masini slip nating na i nogat wok bilong em, traime lukim na stretim long mekim em i wok.

KAMAPIM NUPELA PRODAK O SEVIS

Wanpela i ken kamapim nupela prodak o sevis we i nogat long maket tude na i gat bikpela laikim i kam long ol manmeri. Dispela kain lukluk i save bihainim luksave bilong sampela kain laikim. Ol lain i laik statim bisnis i luksave long hevi na ol i laik stretim. Long bihain, dispela man i kamap gutpela bisnisman.

SPIN-OF BISNIS

Bikos long bikpela risos divelopmen insait long komyuniji, olsem nupela maining, nupeal skul, nupela rot na arapela moa, i kam ol nupela na kain kain liklik bisnis i stat. Nupela main na bikpela fektori, i gat planti wokman husat i mas kaikai na wok, ol i mas gat haus na kolos bilong werim. Nupela skul i mas gat ol skul saplai, yunifom na skul bas. Nupela rot o nupela ples balus i mas gat ol kontrakta na opim ol nupela maket bilong ol kain kain prodak o ol samting bilong salim.

Long kisim moa tingting na helpim long wok bilong Smol Bisnis Divelopmen Kopresen (SBDC)

FRANCIS DAKENNY, SBDC INFOMESEN KODINETA PO BOX 286 WAIGANI, NCD

SBDC helpim yu wantaim liklik wok bisnis



• Salim aisblok em wanpela liklik wok bisnis sampela lain i strong long mekim.



• Eddie Jack i salim melon long Godens maket.

LIVING WITH GAS






BORAL GAS



The quick **SAFE**
clean natural energy
saver **for PNG**

Whether it's needed for
Cooking, Cooling,
Heating or Lighting
... Boral Gas has the answer.

Hot Water System,
Portable Gas Lights,
Benchtop Gas Stoves,
Gas Ovens,
Gas Fridges,
& Freezers Gas BBQ's,
Portable Gas Stoves.

If you need cylinder
refills, just look for the
"BORAL GAS
KISIM LONG HIA" signs.

Yes, Boral Gas.



giving time
BACK to enjoy
the good
LIFE



PORT MORESBY	PH: 321 4248
LAE	PH: 472 3177
RABAUL	PH: 982 1177
WEWAK	PH: 856 2125
MADANG	PH: 852 1341
KIMBE	PH: 983 4117
KBSA Hardware	
Mt HAGEN	PH: 545 1216
Highland's Gas	

WAN SOLWARA NIUS

Solomon Ailan sambai nau long fomim nupela gavman

NESENEL ileksen bilong Solomon Ailan i pinis na ol politikel pati i paitim tokok i go i kam nau long kamapim nupela gavman.

Nau yet em olpela gavman na ol pati long oposisen grup i wok long grisim ol nupela 25 memba long jorum ol na kamapim gavman. Dispela tokok gris i kamap strong nau taim ol 48 nupela memba i staf kamap long biktaun Honiara. Na tokaut long opis na ples bilong wok long Haus Palamen.

Dispela bai namba 6 palamen bilong Solomon Ailans we bai stat long neks wik, Ogas 22. Palamen bai bungim na votim spika na deputi spika. Na 5-pela de bihain long Ogs 27, bai Palamen i bung gen long votim praim minista.

Olpela Palamen i bin apim pinis pe bilong ol Palamen Memba long 31 pesen. Olsem na ol Memba bai kisim nau klostu long K10,000 long wanpela yia. Dispela i olsem K300 long wanpela totnait.

• Long ol arapela nius, 6-pela pipel bilong Anuta Ailan husat i bin lus long solwara em ol i painim pinis. Ol i kisim helpim long Malaita provins bihain long ol i drip namel long solwara long wan na hap wik olgeta. Dispela ripot i kam long Provinsal Plis Komanda bilong Malaita, Philip Manakako.

Manakako i tok kanu i karim 4-peia man, wanpela bikpela meri na yangpela meri. Na ol i bin drip namel long siwara long Is sait bilong Malaita long mande Ogas 11, taim ol i bungim helpim.

Na bihain ol helpim manmeri kisim ol i go long Kilu'ufi haus sik. Na ol dokta i sekim olsem ol ol no kisim wanpela bagarap long bodi bilong ol.

VANUATU: Suprim Kot bilong Vanuatu i tokaut olsem Deputi Praim Minista Barak Sope na Fainens Minista Willie Jimmy i brukim lo, taim tupela i pinisim tupela bod memba bilong Vanuatu Nesenel Profiden Fan., Paul Fred na Peter Chan.

Long mun Jun, Fainens Minista i pinisim dispela tupela bod memba bilong fan. Na i kam long Julai 23, Suprim Kot i putim aut wanpela oda. Dispela oda i stapim Fainens Minista long mekim sampela moa samting long tupela bod memba ya.

Tasol long Julai 25, Deputi Praim Minista Sope i pinisim olgeta tupela bod memba long wok. Sope i mekim dispela taim em i ektim Fainens Minista. Suprim Kot i tokaut olsem wanem samting Sope i mekim i brukim oda bilong kot. Bikos oda bilong kot long Julai 23 long nogat moa samting i ken kamap long wok bilong tupela bod memba i stap yet.

KIRIBATI: Wanpela biknem memba bilong Palamen long Kiribati ailan i dai pinis. Nem bilong dispela memba em Tiwai Awira. Em i bin dai bihain long em i gat sik long longpela taim tru. Awira i gat 56 krismas, na i lusm famili bilong em. Dispela em bihain long em i bin stap long Palamen long 18 yia olgeta, taim Kiribati i kisim independen i kam inap nau.

Awira i gat nem long holim planti minista wok olsem fainens minista aninit long tupela olgeta gavman bilong presiden Ieremia Tabai na presiden Teatao Teannai.

Taim em i kabinet minista long gavman bilong Teatao, em i kisim bikpela toksut long paulim pablik moni. Dispela em bikpela as long pundaun bilong Teatao gavman.

Tasol Awira i strong olsem em i no paulim wanpela pablik moni i kam inap indai bilong em.

KUK AILAN: Gavman bilong Kuk Ailan i holim nau paspot na tiket bilong sampela Sainis manmeri, husat i bin kamap long kantri long las wik.

I gat save olsem ol dispela Sainis manmeri i kamap long Kuk Ailan, na traim long kisim pepa bilong go stap long Nu Silan, Ostrelia, na Amerika.

Ripot i tok opis bilong Nu Silan long Kuk Ailan i no laik givim tokorait pepa long ol dispela Saina manmeri long go stap long Nu Silan.

Nau yet Nu Silan opis i painim moa long dispela ol Saina manmeri, bipo ol i ken givim tokorait pepa.

- OL RIPOT I KAM LONG PACNEWS

Bikbos bilong Kambodia rebel grup kam aut ples klia long namba wan taim

LONG namba wan taim insait long 18 krismas, ol pipel long wol i lukim pes bilong Pol Pot i lida bilong ol rebel paitman grup ol i kolim long Khmer Rouge bilong kantri Kambodia insait long Saut Is Esia.

Ol pipel bilong Amerika i lukim piksa bilong em long namba wan taim long televisen long las wik. Dispela em long taim em i sanap long kot long ansarim ol sas long indai bilong planti milien pipel bilong Kambodia husat i bin indai long han bilong ol Khmer Rouge rebel paitman.

Pol Pot i gat waitpela gras, sik na i no inap long wokabaut

i go long haus kot. Em i lus olsem wanpela man husat i nogat longpela taim long stap laip long dispela graun.

Wanpela niusman bilong Amerika, Nate Thayer i kamap namba wan man long ol westen kantri long lukim Pol Pot insait long 20 krismas. Ol Khymer Rouge lain i bin kisim Thayer long boda bilong Thailand na Kambodia i go long hap we ol i operet long Anlong Veng we i stap long Not Kambodia.

Niusman Thayer wantaim kameraman bilong em i bin kisim vidio piksa long lida husat i karim nem nogut long indai bilong planti pipel. Nau

ol lain we em i bosim ol i kalabusim em. Na kisim em i go long kot.

Pol Pot i bin sindaun isi tru taim moa long 500 pipel i sindaun harim kot long ol lain i tokaut long ol samting we em i bin mekim na kamapim bagarap, pen na taim nogut long planti pipel long Kambodia. Ol ples lain bin givim bikpela sapot long ol lain i kisim Pol Pot long kot.

Niusman Thayer i ripotim olsem kot na olgeta pipel i egensim tru lapun bikman ya husat nau i gat 69 krismas tasol long yangpela bilong en em bin salim moa long 2 milion Kambodia pipel i go long

matmat na klostu Thayer i ting olsem lapun ya bai i dai. Em yusim stik kanda long helpim em long wokabaut. Taim ol lain we bipo i wok wantaim Pol Pot i tok egensim em olsem witnes long kot, klostu em laik dai.

Wol i sutim tok long Pot Pol long dai bilong tu milien pipel long Kambodia long pasin bilong kilim dai, mekim planti na bikpela wok, larim ol go hangere em sampela ol sik we ol pipel i dai long en insait long 4-pela yia Pol Pot i bin go pas long Khymer Rouge rebel grup.

Ripot na piksa i kam long The Guardian Weekly



ANTAP • Ol soldia bilong Jemani i sanap long lain pasim bag wesan long banisim bikpela hai wara we i kamap nau long wanpela hap bilong kantri. Planti tausen soldia i helpim nau long stapim hai wara we i bagarapim planti ples. Mekim na ol soldia i rausim pinis moa long 10,000 pipel long ol ples we i gat bikpela hai wara. Dispela i bin kamap long stat bilong mun Ogas.

RAITHAN • Wanpela sista i lainim kandel insait long tempel o haus prea bilong ol Budis lotu, na wetim tasol ol hevi long biksiti bilong Kambodia long go daun. Nau yet ol pipel i wetim kot bilong bikbos bilong Khmer Rouge rebel lida long sanap long kot. Dispela em long sas bilong kilim planti milien Kambodia manmeri na pikinini.



LEPHAN • Ol manmeri i bung na harim kofin bilong Angel Blanco i go long planim, em ol grup bilong ETA i bin kilim indai i no long i go pinis. ETA em wanpela politikel grup long kantri Spein, husat i laik kamapim kantri gruping bilong ol yet. Na Blanco em wanpela bilong sampela pipel ol ETA i bin holimpas long sampela taim.

Vanuatu Ombudsmen pairim ol sinia plisman

Ombudsmen Komisen bilong Vanuatu i tok ol sinia plisman bilong kantri i no bin mekim gut wok bilong ol. Olsem na bikpela pait i bin kamap namel long tupela ples, we planti haus na abus i bin kamap.

Bikbos bilong Ombudsmen Komisen, Marie-Noelle Ferrieux-Patterson i sutim tok long ol sinia plisman olsem olpela plis komisina, Luke Siba, Deputi Komisina John Bill Ierongen, Asisten Komisina Patu Lui, olpela Mobail Fos Komanda Seule Takal, Plis Superintenden Noel Tamata na Sief Inspekta Knox Kalkaua.

Trabel i bin kamap bihain long bikpela kros namel long tupela man long Paunagisu. Tupela wantaim i tok tupela i sief bilong ples. Orait narapela wantaim ol sapota i statim pait wantaim sapota bilong ol narapela man. Na kamapim bikpela bagarap stret.

Marie i tok plis i tokim ol pipel long stretim long pasin tumbuna bilong ol yet long ples. Olsem na dispela birua i kamap. Em i tok plis i no laik kisim dispela samting i go insait long han bilong ol na stretim long namba wan taim.

Marie i tok gavman i no ken givim wanpela sinia pablik sevis wok long olpela plis komisina Siba. Bikos em i no fit long mekim wok bilong em. Marie i tok tu olsem ol arapela sinia plisman i stap yet long fos, em gavman i mas pinisim o givim bikpela mekimsave long ol.

LAPSTAIL

KANAGE

"Em nau, narapela wik bilong mi ken"



□ Kanage i stap long Goroka na em wantaim Nokondi drama grup i kalap long Air Niugini balus na go long Mosbi. Dispela em namba wan taim bilong Kanage long kalap long balus na tu festaim long go long Mosbi. Kanage kisim sit na sindaun i stap na hea hostes i kisim ti na bisket na givim long ol pasindia. Kanage dring ti na kaikai bisket pinis na wanpela hap pepa insait long plastik bisket em Kanage holim tu na kaikai. Taim hea hostes i kam bek bilong kisim pipia, em luksave olsem Kanage kaikai dispela hap pepa. Olsem na em tokim Kanage, "pren, dispela pepa i no bilong kaikai, em bilong klinim maus na han". Kanage harim na tokim hea hostes, "no waris, sapos mi kaikai dispela bai mi kisim strong na paitim gut garamut bilong Sepik".

Siopé Noku
Goroka

■ Kanage i save wok long Agrikalsa Benk long Goroka. Wanpela taim em i go raun long Goroka maket na ai bilong em i pas long wanpela yangpela meri bilong Ungai Bena stret. Kanage i wokabaut i go klostu na i wok long bihainim lek bilong meri ya wantaim mama bilong em i go. Ai bilong Kanage i pas strong tru long meri ya na mekim na mama bilong meri ya i luksave pinis. Olsem na mama bilong yangpela meri ya i tanim na bikmaus long Kanage na tokim em, "yu lukluk strong long wanem, yu ting em glas bilong lukim pes a?". Turangu Kanage i sem nogut tru na tekov i go pinis.

Wanpela taim gen, dispela mama bilong meri i go long Agrikalsa Benk long kisim dinau mani. Taim Kanage luksave long mama bilong meri ya, em go na askim em, "mama, yu laikim wanem?. Yu laikim dinau, yu givim mi yang meri, mi givim yu benk dinau". "no meri, no dinau, yu give me, I give yu". Mama bilong meri ya i sanap harim na em tingting i go na smail na tokim Kanage, "tok indai, givim tasol, na lets do it".

Tamzii
Goroka

□ Kanage joinim ami bihain long em i pinisim skul bilong em long Gerehu hai skul. Em go wokim tes na em pas. Olsem na ami i kisim em. Bihain long em i pas aut long ami, em les long go long Wewak o Lae o Manus. Olsem na em wok tasol Mosbi na stap. Wanpela taim em diuti long mein geit bilong Taurama Bareks na wanpela yangpela meri Papua i wokabaut i go insait long geit. Kanage lukim na salut long meri ya na tok, "beibs, ate-e-ensen". Meri Papua i harim na pret na em sanap isi tasol. Kanage lukim pinis olsem meri ya i pret olsem na em askim, "Keken mai dia, pret las, pas tru and can I oh?". Meri Papua ino klia tru long mining bilong toktok bilong Kanage em spetim buai long bum geit bilong ol ami na wokabaut i go insait long Taurama Bareks. Kanage lukim na singaut, "em orait, samting em bilong mipela yet long B kampani tasol".

Joe Nimen
Boroko.

Moa tok pilai long pes 17



• Ol ami i pasim toktok long wanem plen ol bai mekim long taim hevi bilong Sandline i kamap. Dispela hevi i kisim nem bilong PNG i go long planti hap bilong wol.

Niusman stori long ekspirians bilong Sandline hevi long UK

LEO WAFIWA i raitim

I GAT bikpela bilip na save olsem ol manmeri i ken tingim nogut samting tasol long longpela taim. Na ol gutpela samting em ol bai lus tingting kwik. Dispela i wankain long nem bilong kantri bilong mipela, Papua Niugini.

Planti manmeri long wol i no save yet olsem i gat wanpela independen kantri, em ol i kolim Papua Niugini. Mi luksave long dispela long taim mi skul long Yunaited Kingdom (UK). Stap bilong mi long UK i bungim klostu long wanpela yia.

UK em wanpela bikpela kantri long wol husat i holimpas demokretik sistem, bihainim long Amerika, na nau em Jemani. Tasol UK i gat biknem moa long lukautim planti koloni olsem Amerika, ol kantri long Afrika, Latin Amerika, na tu long Pasifik, em PNG i wanpela long ol.

Olsem na kain tingting o pasin olsem ol i moa yet i stap yet long planti manmeri. Ol pipel i les o i no busy tumas long save long ol liklik ailan kantri nabaut long wol.

Mi ken tingim namba wan taim mi save tokim ol manmeri olsem mi bilong Papua Niugini, na ol bai askim: "Em (PNG) i stap we?" Na mi bai bekim olsem PNG em i wanpela liklik ailan, i no stap longwe long not bilong Ostrelia".

Sampela mun bihain mi luksave olsem planti manmeri i no save long wanem hap bilong wol PNG i stap. Planti i ting em i wanpela kantri long Afrika. Orait mi painim nupela we bilong tokim ol olsem: Mi bilong PNG, wanpela ailan, stap klostu long not bilong Ostrelia."


Em nau sampela manmeri bai save na askim long ragbi lig tim bilong mipela, PNG Kumul.

Na taim olpela gavman i kisim ol soldia bilong Sandline i kam insait long kantri na hevi i kamap, planti manmeri i stat lukim long televisen, ritim long niuspepa, na harim long radio.

Ol niusman meri long UK i givim bikpela ripot long dispela hevi. I bin gat wanpela protes i kamap tu long PNG Embasi long London. Na ol lain husat i protes i sapat long rausim Sandline soldia na bikman long PNG. Dispela protes tu i kisim bikpela ripot long ol televisen, niuspepa na radio.

Mekim na taim ol saveman meri na wan studen i bungim mi, ol bai askim: "Olsem wanem nau long hevi long ples". Na mi bai bekim isi tasol olsem, "Larim, demokresi o pasin bilong olgeta lain i autim na skelim tingting bai stretim".

Dispela taim mi save pinis nau olsem planti manmeri na studen i save nau long PNG. Na taim mi bungim ol, mi bai tok tasol olsem mi bilong PNG. Na bekim bilong ol em:



• Dispela UPNG studen i soim posta em i karim protes long palamen.

"Olsem wanem nau long hevi long ples".

Nau mi kam bek na tingim ol dispela samting, na save tok: "Tru tumas, mipela gat bikpela wok long putim nem bilong kantri long wol map. I no wantaim ol hevi o nem nogut tasol, wantaim ol gutpela wok. Olsem na wanem manmeri yu limlimbur long

ovasis na bungim wanpela manmeri na tokim em long PNG, wanem hap PNG i stap long wol mep ol tum-buna bilas na singsing bilong PNG. Na sampela moa, yu mas tenkim yu vet Bikos kain liklik heipim ba mekim moa pipel long ol arapela biknem kantri save long mipela



NEM: Anna Betteu
KRISMAS: 18 (meri)
ADRES: Wau Vocational Centre, PO Box 165, Wau, Morobe province.
LAIKIM: Pilai volibal, harim musik, tok pilai, swim long wara, lukim TV, lukim pilai na stori wantaim ol pren.

NEM: Emasang
KRISMAS: 16 (man)
ADRES: Kumbango Division Two, PO Box, Kimbe, WNBK.
LAIKIM: Pilai soka, ritim buk, pilai volibal, tok pilai na ritim baibel.

NEM: Jackey Hombo
KRISMAS: 14 (meri)
ADRES: Sassoaya Primary School, PO Box 682, Wewak, ESP.
LAIKIM: Pilai soka, basketbal, ritim buk, go lotu, tok pilai naharim musik.

NEM: Yegi Lembang
KRISMAS: 16 (man)
ADRES: Agriculture Department Damil Section, PO Box 2183, Gusap, Lae MP.
LAIKIM: Pilai soka, go lotu, harim reggae musik, go raun wantaim ol pren.

NEM: Sussy Besh
KRISMAS: 19 (meri)
ADRES: Free Mail bag Service, Lengbati, Via Lae Morobe province.
LAIKIM: Painim pren, ritim baibel, ritim nius, na laikim tu pilai.

NEM: Segele Gebby
KRISMAS: 20 (meri)
ADRES: Free Mail bag Service Lengbati, Via Lae Morobe province
LAIKIM: Painim penpren, go lotu, stadi long baibel na beten.

NEM: John Sadi
KRISMAS: 17 (man)
ADRES: PO Box 1151, Wewak, ESP.
LAIKIM: Harim reggae musik, pilai spot na lukim TV.

NEM: Simon Angilly
KRISMAS: 16 (man)
ADRES: Mt Hagen High School, PO Box 380, Mt Hagen, WHP.
LAIKIM: Pilai soka, harim musik, tok pilai na pilai arapela spot tu.

NEM: Rennen Mangu
KRISMAS: 15 (man)
ADRES: c/ Mosa Nursery Compound, PO Box 893, Kimbe, WNBK.
LAIKIM: Pilai soka, ritim pas long penpren, pilai gita, waswas long nambis, go long danis na lukim vidio.

NEM: Anna Tolamin
KRISMAS: 20 (meri)
ADRES: c/ PO Box 202, Tabubil, Western province.
LAIKIM: Raitim pas, kukim kaikai, mekim pren na painim man bilong marit.

NEM: Julie Ningue
KRISMAS: 22 (meri)
ADRES: c/ PO Box 202, Tabubil, Western province.
LAIKIM: Raitim pas, kukim kaikai, mekim pren na painim man bilong maritim.

Musik i strong tru long laip bilong Terry Kapi

PLANTI ol liklik mangi na ol yangpela nau long Papua Niugini i save traim hat tru long lainim ol instramen bilong pilai musik na sampela i save gat bikpela laik moa go hariap long rekotim kaset.

JAMES KILA
i raitim

Planti i save laik harim nek bilong ol i kamap long kaset na amamasim ol manmeri long stail bilong musik bilong ol.

Wanpela musik-man bilong Mumeng long Morobe provins, Terry Kapi, husat nau i wok olsem enjinia bilong Walter Bay Studio long Mosbi i bin kam long wankain rot. Dispela longpela rot Terry i bihainim long kamap olsem musikman na wok saun-enjinia em i no isi.

Terry i bin lain long pilai musik taim em i liklik boi yet na i stap skul long Kila Kila Haiskul long Mosbi. Bihain long em i pinis long skul long 1982 boi i go raun long Lae em wantaim ol sampela poroman i save karim ol ben-set bilong ol sampela lain grup em Itchy Fingers. Long dispela taim ol lain ya i no save wari. Maski ples i longwe, ol i save wokabaut na painim musik stret. Ol i save stap long 5-Mail, tasol ol i save taitim rot na painim danis long 10-Mail o long Kamkumung na ol sampela ples moa.



• Terry Kapi (wantaim iapon) i sindaun na skelim musik bilong Michael Tibam insait long Walter Bay studio.

Ol i mekim i go na sampela taim Terry wantaim ol poro bilong em i save askim long lain ben ya stap long pilai taim ol lain ya i malolo.

Dispela bikpela lain bilong Terry long musik i strong tru na mekim i go na em wantaim ol lain bilong em i

joinim wanpela grup insait long setlemen bilong ol. Ol i kolim dispela ben 5 City Roots. Ol i bin pilai raun i go, tasol bikpela tingting bilong Terry em long rekot.

Olsem na long 1989 ol i mekim wanpela demo-kaset na salim i go long Mosbi. Tasol long dispela taim ol i no bin kisim gutpela ansa tumas. Turangu, ol i traim narapela taim gen na bihain long wanpela yia ol i kisim ansa.

Long 1990 Terry wantaim grup bilong em Faiv Souls i bin kamaut wantaim namba wan kaset bilong ol Cee-Tee 5.

Bihain long sampela yia Terry i bung wantaim sampela ol poroman bilong Mumeng olsem Tom Gedisa, na ol i statim wanpela narapela grup gen em Junior Membaks. Dispela grup i bin rekotim kaset bilong ol wantaim Pacific Gold Studio.

Terry i bin stat wok wantaim Walter Bay Studio long 1991. Dispela taim em i stap olsem sesin-musikman tasol na i bin wok long rekotim namba wan solo kaset bilong em. Bihain em i kisim tok-orait long bos bilong Walter Bay, Frank Parkinson long wok. Bos bilong em i luksave long wok bilong Terry na givim olgeta samting long han bilong Terry long lukautim long sait bilong rekoting na enjinia insait long studio.

Long 1992 em i katim namba tu kaset bilong em Terry Kapi and Faev Souls.

Terry wantaim ol grup bilong em i bin rekotim wanpela nupela kaset bilong ol wantaim Chn H Meen long Mosbi long las yia tasol 1996. Taitol bilong dispela kaset em "Mangi 5 Souls"

Terry i tok olsem ol karai bilong musik i kam long Walter Bay Studio i wok long senis yet. Kwaliti bilong ol i go wankain tu olsem ol narapela bikpela studio insait long kantri.


Bihain long Terry i kisim wok olsem sif-enjinia em i skelim olsem planti manmeri long PNG i save laikim-yet fleiva bilong lokal musik. Olsem na ol enjinia i mas skelim gut ol karai bilong musik long stretim wari bilong ol PNG manmeri husat i save skin kirap long lokal musik.



TOP

20

This Week!



L/W	T/W	SONG	ARTIST
1	1	ACTING YANG	WALI HITS
4	2	AZZIMBAH	AZZIMBAH
3	3	AI DAUE	WALI HIT
2	4	LULU	QUAKES
10	5	OPERESSEN RAUSIM KWIK	K PINERI
8	6	SHERRY	S. SEREVI
5	7	MANU AFAI HIMENE	LAURENT DEGACHE
9	8	MERI WALI	WALI HITS
6	9	ANGEL MANGAS	JUNIOR KOPEX
7	10	IA LYNETTE	LEONARD KANIA
13	11	TAMATA	QUAKES
15	12	GIA BOX I BAGARAP	WILLIE TROPU
18	13	NIPSCO	JR MOLACHAS
11	14	DESI	TELEK
12	15	KULUNGI	JUNIOR KOPEX
17	16	MERI DOI	C. KUSKUS
14	17	KAKAUL	KANAI PINERI
19	18	ERA BINI TU	KABANI
16	19	KEPOKO	TARIKANA
0	20	STAP SORE	URALOM KANIA



PNG FM PTY LTD
 Trading as
 NAUFM and YUMI FM
 P.O. Box 774,
 Port Moresby
 Papua New Guinea
 Ph: (675) 320 1996
 Fax: (675) 320 1995



Bik Bro

REBO



B-BOSS..I GAT SANS LONG MI KISIM WOK BILONG MI BEK BIHAIN LONG WAN MUN?

OH-YES! YU KISIM WAN MUN OFF LONG HAITIM PES BILONG YU. NOKEN WARI!



TAIM YU KAMBEC BAI BENK I TRANSFERIM I GO LONG WANPELA BRENS BILONG YUHI..

..ATING LONG WEKAK O MADANG... GO MALOLO PASTAIM!

TRENSFER?! BAI MI GO LONG WE?



FONDE... TAIM BILONG OL RASKOL LONG MEKIM MUV BILONG OL...

OKE, BOIS.. YUPELA REDI PINIS?

MIPELA REDI, FADA!



TASOL OL INO SAVE OLSEM OL POLIS TU IREDI NA WET ISTAP..



OLGETA WERIM SINILIAN KLOS NA SANAP I STAP..

OL YUNIT STAN-BAI FOR EKSEN!



OLGETA KAR BILONG POLIS TU IREDI NA WET I STAP LONG OLGETA KONA...

OL MOBAIL STAN-BAI!!

Igo moa Neks Wik!!



SIPAK MAIK



POLIS IGO KWESTENIM MAIK LONG EM I SALIM BIA...

MIPELA SAVE OLSEM YU RONIM BILAK MAKET BIA!

WAT?! MI WANPELA BISNISMAN, INO ILIGOL BIAK MAKET DILA!!



MIPELA I GAT PRUF LONG DISPELA MAN!

HALO, MAIK.. YU SAVE LONG MI? MI BAIM BIA..

BULSIT! MI NO LUKIM PES BILONG YU LONG LAIF BLO MI!



SAPOS YU GAT SERCH WARRANT YU SERCHIM HAUS, SAPOS NOGAT, PLIS LIV MAI PRIMISIS!!

!?!



SERCH WARRANT? NO WARIS, MI GAT!

!?!



OKE, BOIS! MUV IN NA TERN DA PLES APSAIT DAUN!




LUSIM OL PINISIM LAIK... MI SALIM OLGETA BIA PINIS!!

CRES! SMASH! CLANK!

Igo moa Neks Wik!!

Introducing White Sugar



RAMU
SUGAR

“Natural as Life”

Muna abus bilong ol hailans stret

SAPOS yu husat manmeri na pikinini bilong nambis i save stap long nambis klostu long solwara na taim solwara i bruk, yu ken save gut long ol kain kain abus nabaut antap long nambis. Em yumi ken painim ol abus olsem kina, kuka na ol kain kain sel pis we i gat gutpela long kaikai.

SAPE METTA
i raitim

Insait long solwara em yumi i ken painim planti ol kain kain abus tu olsem pis, trausel, urita, sampela sel moa, kuka na kindam long kain kain sais na ol kala. Ol lain long sait bilong nambis i save painim ol dispela abus na ol i save laikim tru long kaikai.

Long sait bilong hailans, em i hat tru long painim ol dispela kain kain abus bilong nambis. Long wanem ples i kol na i no stap klostu long solwara. I tru olsem ol kain kain abus olsem pis na kindam i ken kamap long hailans. Tasol tingim, ol i no swim na kalap kalap i kam antap. Ol pis na kindam i save kamap long hailans insait yet long bokis ais, na ol i save kamap long wan wan taim. Mekim olsem na planti taim yumi husat ol nambis lain i save i stap long hailans i save kisim taim stret long kaikai ol abus bilong solwara na nek bilong yum i save draio stret. Tasol wan wan taim yumi lukim ol bikipela stua na supamakot i save salim ol pis na kindam. Em nau yumi i save gat sans long baim na kisim i go kukim na kaikai.

Pis em i namba wan abus tasol kindam em i win tru bikos em i gat naispela tes na long dispela as,



• **Abus ya...** Ol lain long Genoka setelmen long Goroka i kukim muna antap long babakiu plet.

prais bilong em tu i go antap tru winim prais bilong pis.


Nau mi laik soim wanpela kain abus we i save kamap long hailans.

Yumi olgeta i save olsem long hailans, ol pipel long hia i save kamapim kain kain gutpela kaikai na kumu. Abus kaikai long bokis ais na abus bilong ples stret tu i stap.

Wanpela kain abus tu i save kamap long hailans na ol manmeri na pikinini i save laikim tru long kaikai. Dispela abus i gat 4-pela win na 6-pela lek na i save kamap namel long mun Julai na Ogas long olgeta yia. Dispela abus i luk moa olsem binatang na i save i stap insait long graun. Ol i save

kamaut namel long 5 kilok apinun na lus nating i go bek insait long graun long 7 kilok nait. Tupela aua bai ol i flai nabaut antap long graun.

Na taim ol i save kam aut na flai nambat, em i taim we ol manmeri na pikinini i save raunim ol na kisim na ol i ken kisim planti handret na karim i go bek long haus. Na bai ol i stat long rausim ol win na lek bilong ol dispela binatang. Bihain bai ol i kapsaitim long BBQ plet o parapan na pუსim sampela kukim wel o gris na bai ol tanim tanim. Taim ol dispela binatang i kuk gut tru, em nau ol bai kaikai na kisim gutpela swit bilong em. Ol displea binatang i gutpela abus bilong kaukau na kumu na swit bilong em




• **Bras,** yu traime em hap abus bilong ol yangpela long hailans. POTO: Sape Metta.

i wankain olsem kindam bilong solwara. Sapos ol lain bilong nambis i save painim na kaikai ol kindam, ol lain abilong hailans tu i save

painim dispela binatang we wankain stret olsem kindam. Na dispela ol binatang ol i save kolim muna.

Oi laipstail photo



• Junia Saunders i amamas long raun antap long MV Doulos.



• Oi famili long Goroka i kukim muna na kaikai. POTO: Sape Metta.




• Wapela Fri skul long setelmen long Korobosea i kisim helpim long Rais Industri. POTO: Eddie Saunders.



• Oi katolik mama grup bilong Holi Spirit peris na Sarang peris i senisim basket olsem pasin bilong wokbung na pren. Oi mekim dispela pasin bilong strongim wok bilong oi mama long Madang. POTO: Fr Gregory Tianni.

CONCENTRATED CLEANING POWER

STRONGPELA PAWA
BILONG KLINIM
NAUKA LONG
LIK LIK TAB BAR





■ Kanage i bilas stail na go dring long wanpela hotel long Goroka i stap. Em sindaun dring i go na lukim wanpela meri Samarai i sindaun long sait i stap. Em nau Kanage sailim ai long meri ya na em i kam. Tupela sindaun wantaim na Kanage askim meri Samatex ya olsem, "halo, yu wana dring?". Na meri Samatex bekim long tok pisin olsem, "yes, pills mi laik dilin loli wota, em olo meeli i save dilin lon en". Kanage kirap bekim gen long tok Inglis, "hey babe, I don't understand your language". Tupela sindaun dring gut i stap na wanpela wantok bilong Kanage long Asaro i kam. Taim Kanage lukim olsem, em giamanir meri Samatex na ron i go hait long toilet i stap. Taim wantok bilong em i go pinis, em kam bek gen. Yu save, Kanage i save olsem wantok bilong em bai tok ples Asaro stret ya. Olsem na em i mas hait. Bikos em paulim tingting bilong meri Samatex pinis wantaim tok Inglis ya.

Kanage Nokondi Goroka

□ Kanage marit long Makam na em wantaim misis i go long ples long kisim buai. Misis Kanage sanap long as bilong buai na salim paps Kanage i go antap. Paps Kanage givim siksti i go kamap long het bilong buai na han i go long pulim rop bilong buai stret. Na wantu em pilim wanpela kain pen i kisim bodi bilong em. Man, Kanage lusim buai i stap na em givim kam daun gen. Em kam daun na wok long painim na sekim wanpela samting aninit long as bilong buai ya i stap. Mekim na misis Kanage kirap na askim, "yu painim wanem samting?". Na Kanage tok, misis, hay bilong mi i lus ya". Na misis i tok, "yu no bin werim wanpela hat na yu go antap long buai". Kanage wantaim misis i painim i go inap klostu tudak na misis Kanage bel hat na tok, "yu no liklik boi moa bai hat i stap long pes bilong yu olgeta taim, sapos hat i lus, pulim i go bek antap na haitim pes bilong yu". Kanage daunim het na lap wantaim na nau em givim go antap gen long buai na rausim wanpela bikpela rop buai i kam daun.

Kanage Nokondi Goroka

■ Kanage i sindaun klostu wantaim wanpela meri Wabeg na tupela i putim ia long harim ileksen risal bilong Vanimo Grin Open. Tupela sindaun harim i stap na Kanage ai slip na em slip olgeta. Na meri Wabeg i wok long harim i go na ol i kolim nem bilong tar ju bilong meri Wabeg ya olsem em i win. Man, meri Wabeg kalap na bikmaus na amamas nogut tru na tok, "manki Sandaun, yu tasol na ol meri Wabeg i tok, Sikau i prenim Muruk na Muruk kamapim yu". Kanage slip i go na harim na em kirap nogut. Meri Wabeg tanim na holim pas Kanage na kalap kalap moa yet. I no longtaim, Kanage pilim olsem han bilong em i kol olsem na em tok, "a ol manki Sandaun tasol i save mekim na ol meri Wabeg i save amamas tru na pispis long sket bilong ol".

Taima Huok Vanimo

□ Kanage i bilong Morobe na em save prenim wanpela meri Sepik. Kanage i stap long Kabwum na meri i stap long Boikin long Is Sepik. Tupela i oltaim salim pas i go i kam. Wanpela taim, meri Sepik i salim wanpela naispela pas tru i go long Kanage na em ritim na i slip tanim tanim long nait. Long moning, Kanage bekim pas bilong meri Sepik gen. Taim meri Sepik ritim pas bilong Kanage, em lap tasol. Pas bilong Kanage em olsem, "dia my swit lewa Gloria. I love you tru and forever. How and why I always dream about you?. One fine day, I will come to the village and we make one baby for you and me". Gloria ritim pas bilong Kanage pinis na em bekim gen, "Dia Kanage, my swit lewa. you already pay me and im free for you and you will come and we make baby in the eyes of my family". Kanage ritim dispela pas na em i no wet. Kwiktait em bukum sip na tekov i go long Wewak. Yumi no save nau, bai Kanage istap gut o bai em bungim hevi. Nogut man i save yet long dispela stori. Tasol sampela lain long Wewak inap tokim yumi long neks wik.

Orengtop Bau Mosbi (9 Mail)

Tude pusi na rat i birua

LONG bipo bipo tru, pusi na rat em tupela gutpela poroman tru. Olgeta taim tupela i save wok bung wantaim na mekim olgeta wok wantaim.



Wanem kaikai narapela i painim, bai tupela i mas serim wantaim. Rat na pusi em tupela poroman tru winim olgeta arapela abus na enimol. Bikos planti arapela enimol em ol i stap birua yet long arapela.

Wanpela taim rat i go raun long gaden long painim kaikai bilong tupela long kaikai long haus long apinun. Rat i wok long digim graun i go i go na wanpela liklik pisin i kamap long gaden na bikmaus long rat. Man, tewel bilong rat i lus nating na em ting wanpela birua i laik kamap. Em tanim na lukim liklik pisin ya na em bikmaus na tok, yu mekim na mi kirap nogut. Yu gat wanem samting long givim mi o wanem gutpela tok tok long tokim mi?.

Nau pisin i tok, pren, mi save lukim yu mekim planti bikpela wok tru. Na pren bilong yu pusi i no save mekim wanpela wok liklik. Olgeta taim em bai sindaun tasol na yu redim ol kaikai na ol samting na em bai kisim tasol. Tasol rat i tok, tupela i no save kros na tupela ino gat wanpela hevi long dispela. Olsem na sindaun bilong tupela i gutpela olgeta taim.

Nau pisin i tok gen, pren; taim yu save raun long gaden o mekim arapela wok, pusi i save pinisim olgeta kaikai bilong haus na bihain em i save go bung wantaim arapela enimol na tokim ol olsem yu em wokboi bilong em. Na em bai kaikai tasol na wet inap long wanpela gutpela taim, bai em kilim yu na kaikai.

Taim rat i harim dispela tok, em i no wanbel tru. Long pastaim, em i no bilip long dispela tok win. Tasol bihain, em ting olsem dispela tok tok i mas tru.

Pisin i tok, olgeta taim mi save flai i kam sindaun antap long haus bilong yutupela na lukim pasin bilong yutupela. Na taim pusi i save go long bung wantaim ol arapela eni-



mol, mi save flai i go tu na sindaun na harim tok tok bilong ol.

Taim rat i go bek long haus, em i stat long wokim plen bilong kilim pusi nau. Em tingting i go na wanpela gutpela plen i kamap long em.

Wanpela taim na rat i tokim pusi olsem long narapela sait bilong ailan i gat planti kaikai i stap. Olsem na tupela i mas go na painim.

Nau pusi i askim, bai mitupela i brukim solwara na i go olsem wanem?. Tasol rat i tok, bai mitupela i mas wokim kanu na mitupela i ken pul long en na brukim solwara i go long hap sait na kamap long dispela ailan.

Em nau tupela painim ol samting bilong wokim kanu long en. Tasol rat i tok, sapos mitupela wokim kanu long diwai, bai diwai i go daun long wara na mitupela bai dring wara na dai. Olsem na mitupela i mas wokim kanu long kaukau. Em nau tupela painim wanpela bikpela kaukau tru long gaden na tupela stat wokim hul long namel na sapim ol sait bilong kaukau na mekim kamap olsem wanpela liklik kanu.

Long sait bilong kaukau, rat i wokim wan-

pela liklik rum i go gen. Na em kisim wanpela longpela mambu bilong pul wantaim.

Long moning tupela i pul long wara i go kamap long namel na tupela i hangre. Olsem na rat i tokim pusi long lukluk i go fran na lukim sapos sampela ailan i stap klostu bai tupela i ken go hariap na painim kaikai. Taim pusi i lukluk i go long fran. rat i wok long kaikai ol sait bilong kaukau. Em kaikai i go na kaukau i op bikpela na solwara i kam insait long kanu. Taim ouai i lukim dispela em bikmaus, hevi wara i kam insait long kanu ya. Tasol tu leit pinis. Solwara i kam bikpela na kanu i go daun long solwara. Tasol rat i wokim plen bilong em pinis olsem na em kalap i go insait long liklik hul long kaukau yet na hait. Em kisim longpela mambu bilong pul na pulim win long en. Na solwara i karim em isi isi i go kamap long nambis na em amamas na stap iaip. Turangu pusi i go daun long solwara na dai.

Olsem na long dispela taim nau, pusi na rat i save birua nogut tru. Taim pusi i lukim rat, bai em i kalap na kilim em hariap na kaikai. Sapos rat i lukim pusi, em bai longwe yet hait na tekov.

Kastom tok tambu long slip wantaim meri taim em i kisim sik mun

Torn between two.

Dia Pren,

Ol bilip bilong pasin kastam em ol bikpela samting tasol long wankain taim tu, planti ausait pasin bilong ol waitman i wok long kam insait long sosaiti na komyuniti bilong yumi. I moabeta long wan wan bilong yumi yet long skelim wanem samting i gutpela o nogut long yumi na yumi bihainim o ab rusim. Tru ol dokta i tokim yumi olsem em i orait long tupela marit i slip wantaim long taim meri i lukim sikmun bikos nogat samting bai i kamap long ol na ol pikinini.

Tasol moabeta yu respektem laik bilong meri sapos em i tok nogat long dispela samting taim em i gat sikmun. Tingim, meri bilong yu i gat ol arapela wok long lukautim famili, wokim hauswok, klinim haus, kukim kaikai bilong famili na ol arapela wok moa olsem. Tu wok long lukautim ol pikinini i givim bikpela hatwok long en taim ol i no harim tok na ol dispela i ken mekim meri bilong yu les.

Bihain long klinim haus, kukim na redim kaika na lukautim ol pikinini meri bilong yu bai i belgut na amamas sapos yu mekim gut long eh na larim em i kisim gut maiolo.

Long taim bilong sikmun, ol meri i save bungim ol kain hevi long bodi bilong ol bikos long kain tenis i kamap na olsemol i

save luk les, wari o ol i pilim pen long dispela taim. Bodi bilong wan wan meri long wankain.

Taim yu luksave wanem samting taim meri bilong yu i no stap o luk amamas taim em i gat sikmun em bai helpim yu long moa long mekim marit bilong yu. Olgeta i stap gut na pas wantaim. Sapos yu marit gut meri bilong yu long soim tasol na larim em maiolo gut em bai amamas na mekim yu gut long gutpela taim bilong em.

Ating meri bilong yu i no luksave pisen em i wokim dispela pasin bilong kros hariap na i no amamas long taim em i stat long kain sindaun na kain taim tasol dispela luksave bilong yu na sapos long em bai mekim em amamas. Gutpela taim tu sapos yu kisim meri bilong yu long dokta long sekim em long panama i stap em i stap gut.

Laiplain.

TOKSAVE

Salim ol hevi na wari bilong yu i kam long: Laiplain, PO Box 6047, Boroko. Yu ken ringim mipela tu long telipon namba 326 0011, Mipela i no inap autim trupela nem bilong yu long hia. Tasol taim yu rait long Laiplain, yu mas putim trupela nem na adres bilong yu, bai mipela ken bekim pas bilong yu.



Long kastam bilip bilong mi em i tambu long slip wantaim meri bikos long bagarap we bai kamap long pikinini na tupela marit wantaim tu. Mi wari tru na mi laikim sampela helpim long dispela.

Dia Laiplain,

Mi wanpela marit man na mi wari long slip wantaim meri bilong mi taim em i lukim sikmun bilong em.

Long bilip bilong pasin kastam sik bai i kamap long tupela marit na pikinini sapos tupela i slip wantaim long taim meri i gat sikmun. Mi no klia nau long bihainim dispela kastam o abrusim.

Sampela taim tu, meri bilong mi i no save luk amamas, em i save luk taiet na kros na dispela i afektim sindaun bilong mitupela.

Maski long skelim blak skin na ret skin man

Dia Edita,
Mi sapotim pas bilong tupela brata B.H. Likus, wantaim Rovat Joshua Koyakia na bekim pas bilong Tony Albet. Mi laik save oisem Tony yu bilong wanem kantri? Ating yu bilong Africa we ol save resis long blak skin na ret skin! Ating yu i no bilong dispela kristen kantri Papua Niugini. Long Papua Niu Gini nau no gat wanpela haiden manmeri i stap. Yumi olgeta kristen manmeri i pulap i stap. Wanpela lain tasol em ol haiden em ol nupela bebi ol mama i karim. Ating yu wanpela nupela bebi mama i karim yu nau tasol oisem na yu i no kila gut na wokim krarki toktok. Na tu yu i no man. Tony yu mas long-glong pinis. God i no save skelim yu blak skin, ret skin o wait skin. Hia long Hagen, ol Buka i pulap tru i stap na mi save amamas tru long lukim ol Hagen em ples bilong ol Buka na ol i ken i stap. Plis Tony mi askim yu long neks taim yu no ken westim taim bilong wok na raitim ol toktok i no gat mining bilong em. Yu husat laik bekim o sapotim pas bilong mi rait tasol i go long Wantok na bai mi ritim na amamas.

**Tanu Wati
Mt Hagen
WHP.**

Narokobi mas resis long Is Sepik rijonal long neks ileksen

Dia Edita,
Mi laik autim tingting bilong mi long ol pipel bilong Wewak na Is Sepik. Mipela olgeta harim pinis olsem sief bilong mipela, Sir Michael Somare bai makim mipela long las taim nau long Palamen. Sapos Sir Michael bai bihainim dispela toktok bilong em, mipela ms tingting gut nau.
Mi yet mi lukim olsem bikpela salens tru bai kamap long neks nesanel ileksen. Olsem na mi

laik autim tingting i go long ol pipel i skelim.
Mi laikim olsem Memba bilong Wewak na Oposisen lida, Bernard Narokobi i mas go sanap long Is Sepik rijonal. Mi bilip em bai winim dispela sia isi olsem Sir Michael save winim nau.
Na dispela bai opim rot bilong ol yangpela saveman na save-meri bilong Is Wewak long resis long Wewak Open. Mipela gat planti saveman na savemeri i

stap long makim Wewak Open pipel.
Nau yet em olgeta samting i stap long han bilong Sir Michael. Em i tokaut pinis na ms bihainim na noken sanap gen long ileksen. Bikos bipo em i mekim wankain toktok na bihain em sanap gen long 1997 ileksen.
Em tasol na mi wet long lukim tingting bilong ol arapela Is Sepik pipel insait long kantri.
**Joe Kungama
MOSBI**

Noken yusim ol turangu i ong kisim mani

Dia Edita,
Mi wanpela mangi bilong Morobe tasol nau mi i stap long Kimbe, Wes Niu Britan. Mi baim Wantok na mi ritim tok bilong Elisah long ol turangu na mi sapotim em.
Dispela em i tru husat yu gutpela man i save salim ol turangu man em yu no mekim gutpela pasin.
Larim ol turangu man i stap long haus bilong yu. Na yu

painim mani long tuhat bilong yu yet. Olsem na yu husat man i maketim ol turangu yu mas tingting long yu yet. Noken mekim dispela pasin. Em i rabis pasin tru. Em tasol na yu husat brata o susa i laik sapotim mi welkam tasol. Bai mi lukluk long Wantok Niuspepa.
**Mista Livai Ilo
Kimbe, Wes Niu Britan
provins.**

Ol Sepik long narapela provins, go bek long asples

Dia Edita,
Mi wanpela mangi Sepik na nau mi stap long Wewak taun mi laik sapotim pas bilong poro hia Kiua Gwambik (Goroka) Wantok Niuspepa, Julai 10, 1997.
Tingting bilong mi em i wankain tu olsem bilong yu. Mi save lukim ol Wantok bilong mi ol Sepik long olgeta ap bilong PNG. Na sutim nus nating nating long o taun olsem Madang na Lae. Plis-inap long yupela i kam bek long ol asples na yumi

bung na istap. Apsles bilong yumi i gat Saksak, Mangro, buai na kain taim olsem ol samting i pulap i stap.
Plis inap long yupela i kam bek. Maski long skin strong nating na i stap long taun bilong ol narapela man. Em tasol toktok bilong mi, mi bai amamas tasol long bekim pas bilong yu, sapos yu agensim o sapotim. Em i orait tasol.
**Gawi Tu Gut
Wewak, Is Sepik provins.**

Wanem taim bai prais bilong ol meri i go daun

Dia Edita,
Mi laik autim wari bilong mi i go long ol manmeri long Papua Niugini. Mi save harim na lukim, dispela samting i kamap long Papua Niugini. Mi save olsem olgeta hap samting long bodi bilong man na meri i sem. Tasol wai na ol papamama bilong ol yangpela meri i sasim ol meri long bikpela prais.
Mi lukim na harim sampela man i baim moa long K10,000 pe long ol meri ya. Plis mi laikim yupela ol papamama o brata mas daunim prais bilong ol yangpela meri. Em i no ka na yupela sasim ol long bikpela prais.
Yu husat ritim dispela pas i mas tingting gut long dispela ol toktok bilong mi.
Em tasol na yu husat i laik sapot o engens em orait. Rait tasol i go long Wantok na bai mi ritim.

**Ola Masip Sumbo
Mendi, Sauten Hailens
provins.**

Noken daunim Kimbe

Dia Edita,
Mi laik sapotim pas bilong Damien Rongo, long Julai 31, 1997 long bekim pas bilong brata Mark long Moso Treding, Kimbe. Brata yu tok Hagen i Klin? Sori tru. Mi sem long dispela hap toktok blong yu brata. Yu noken apim nem bilong Hagen nating. Em wanpela pipia taun bilong yu. Em i pulap long pipia na pekpek bilong pik, sipsip, dok na skin buai.
Brata mi save go long taun na save pret long raun long Hagen taun bikos em i denjares tru. Bipo em i bin gutpela taun tru. Tasol nau Hagen i bagarap nogut tru. Brata mi wok long Hagen taun tasol mi les long en bikos em i nogut pinis na olsem mi kam bek na wok long Goroka. Mi bilong Kimbe, Wes Niu Britan Provins.
Mi no inap toktok long Kimbe bikos mi lusim Kimbe long 1985 na mi no go long Kimbe liklik na lukim i senis o nogat. Olsem na mi no inap apim nem bilong Kimbe.
Em tasol liklik hap pas bilong mi na sapos yu no hamamas long lukim, yu ken bekim pas. Yu husat i laik bekim o sapotim dispela pas bilong mi, mi bai hamamas long lukim long Wantok Niuspepa tasol.
**Isaac Kondi Demi
Goroka, EHP**

Peter Barter i mekim gutpela wok

Dia Edita,
Mi tenkim papa God long hariim prea bilong mipela. Na mi amamas olsem tru papa God i makim pinis nupela lida long ronim kantri bilong yumi long arapela 5-pela yia.
Mi laik tok tenkyu long ol olupela memba long gutpela wok ol i mekim taim ol i makim ol pipol bilong ol long haus palamen. Sampela i winim bek sia bilong ol na sampela i lusim pinis sia bilong ol.
Mi tok tenkyu long memba bilong mi long Goroka long wok em i mekim. Em strongpela man bilong toktok tasol toktok bilong Sandline i mekim na em lus. Na mi tok amamas na givim spesol tenkyu bilong mi i go long olupela gavana bilong Madang Peter Barter long gutpela wok bilong em.
Mi bin kirap nogut long harim olsem em i lusim sia bilong em long Madang.
Riginol sia. Planti taim mi save ridim long niuspepa na lukim long TV long wok em i mekim, na mi ting em man tru bilong mekim wok.
Em i wok faipela yia tasol na em i soim gutpela piksa bilong lidasip. Taim bagarap i kam long Madang provins olsem Manam i pairap o arapela hap bilong kantri, dispela man Peter Barter i save stap wantaim mipela long gut taim o taim bilong bagarap long karim hevi wantaim na tu em i save larim helikopta na sip bilong em long mekim wok long taim bilong hevi na tu helpim ol mama i gat hevi i go stret long haus sik.
Mipela ol lain long narapela provins i luksave olsem taim Peter Barter em i wok long sotpela taim tasol, Madang taun i senis na Madang provins i kisim gutpela sevis. Mi bilong hailens tasol mi save amamas long wok Peter Barter i mekim long Madang provins. Dispela em i developmen bilong kantri bilong yumi.
Mi laikim kain man olsem Peter Barter long karim hevi na givim sevis i go long ol pipol. Ating ol pipel bilong Madang i ai pas na ol i no lukluk gut long wok em i wokim, sapos nupela gavana i no wok stret mi sori tru ol Madang bai i stap wantaim belpen na noken kra i go long Peter Barter long helpim yupela, long wanem yupela i asua na PNG tu i wari long lusim dispela man.
Sapos ol Madang i les long Peter Barter, mi laik em i mas kam antap na kontes long wanpela sit long hailens long yia 2002 ileksen. Mi ting em bai win nating long wanem mipela i save pinis long wok em i mekim taim em i stap 5-pela yia tasol long haus tambaran.
Em tasol liklik wari na tok tenkyu bilong mi i go long ol olupela memba. Yu husat i no wanbel wantaim mi plis rait long Wantok Niuspepa, tenkyu.

**Mikasi Vizitara
Goroka, Isten Hailens provins.**

Sios i wokim gutpela long ileksen

Dia Edita,
Mi wanpela mangi Morobe na mi laik putim bel hevi bilong mi long Wantok. Bel hevi bilong mi i go olsem. Mi bin ritim *Post Courier* bilong Trinde 9, Julai 1997 we ol toktok bilong nesanel presiden bilong Pangu Pati Mista Wia i bin mekim long ELCPNG i stap.
Sios em i no bin kempen long wanpela kendidet long dispela ileksen.
Sios i helpim ol manmeri bilong God long transport tasol na i no wok politik.
Mi laik tokim Mista Wia olsem taim bilong kempen yu stap we tru. Yu go long ovasis o yu i stap long bel bilong mama bilong yu na taim bilong kempen pinis na ileksen tu i pinis na nau tasol yu opim traipela maus bilong yu?
I luk olsem Jerry Nalau i lus na yu opim maus. Taim bilong ileksen yu no laik raun na opim maus. Em lus nau na yu opim maus. Jerry Nalau i lus bikos long yu Mista Wia na ol wok manmeri long opis bilong em.
Nau yu mas pasim maus bilong yu na i stap isi tasol. Ol sip bilong Luteran Siping i ken i go i kam long Buki na Maneba. Yu wanpela man tasol noken pasim transportes bilong amas tausan manmeri pikinini bilong Finschaffan, inap yu karim ol i go i kam long Lae-Finch.
Long nao yet yu mas pasim maus olgeta noken opim gen. Tenkyu tru.

**Mista Gusa Ya'ap
Lae, Morobe provins.**

Gavman bai bruk Yusim ID kat long vot

Dia Edita,
Mi wanpela mangi Sepik tasol nau mi stap long Morobe provins long Bulolo. Mi laik autim wari bilong mi long gavman bilong dispela yia. Long lukluk bilong mi olgeta lain i gat planti eksperiens i stap long oposisen. Sapos ol i bin pomim gavman, gavman bai ron gut. Na tu sampela bilong ol lain i bin bagarapim gavman, ol tu i stap long dispela nupela gavman olsem na mi bilip tru olsem dispela gavman i no inap ron gut.
Em tasol na yu husat i laik bekim pas bilong mi plis rait tasol i go long Wantok na bai mi ken ritim pas bilong yu.
**Eddie M Taio
Bulolo, Morobe provins.**

Dia Edita,
Mi wanpela grasrut mangi husat i no amamas long ilektorel komisen long i no raun long olgeta ples na kisim nem bilong ol manmeri. Olsem na planti bilong mipela i no bin vot. Mi wanpela mangi husat i no wanbel long dispela pasin. Yu husat kendidet i lus long ileksen yu mas kisim ilektorel komisen i go long kot.
Na narapela mi gat long en i go olsem.
Stat long nau ilektorel komisen i mas senisim dispela sistem bilong putim nem long komon rol. Dispela i no gutpela tumas, bikos planti i yusim nem bilong sampela man we ol i dai pinis o ol i no i stap moa long dispela ilektoret.

Ilektorel komisen i mas yusim ol I.D. kat. Long yia 2002 yumi mas vot wantaim I.D kat sistem. Man no gat I.D kat em i no inap vot. Sapos yumi bihainim dispela sistem bilong I.D kat ating bai nogat planti hevi tumas.
Yu laik votim husat man yu laikim em long i stap lida bilong yu orait yu yet mas baim I.D kat bilong yu we i gat sain bilong ilektorel komisen i stap long en. Mi laikim dispela sistem i mas i stap long provinsal na nesanel ileksen wantaim.
Yu husat laik sapotim o egensim orait rait tasol i go long Wantok Niuspepa na bai mi lukim.
**Mr Gusa-Yaap.
Lae MP.
P O Box 128.**

Sapos yu laik long salim pas bilong yu, yu mas salim dispela adres:

**EDITA
WANTOK NIUSPEPA
P. O. BOX 1982, BOROKO,
NATIONAL CAPITYAL DISTRICT**

• Yu mas putim trupela nem bilong yu long pas bilong yu.

Toktok bilong Pater Michael Igo i tru

Dia Edita,
YUMI noken kisim toktok bilong Edministreta bilong Mosbi Asdaiosis, Pater Michael Igo olsem wanpela tok bilong bagarapim ol waitman misineri husat i save wok hia long Katolik sios bilong PNG.

Dispela tok bilong em i go tasol long ol man husat i save wok long opis bilong Katolik sios long kantri.

Ol bikman husat save makim ol bisop bilong yumi.

Long faipela bisop ol i bin makim pinis, ol i bin luk daun long ol pater bilong PNG.

Dispela i kamapim planti askim olsem: Wanem wok

bilong Katolik Bisop Konferes (CBC) na ol i gat wanem tingting bilong ol long ol sios insait long Melanesia?

Dispela kain pasin bilong CBC na Vatican long luk daun long ol wokman bilong sios insait long kantri i no gutpela.

Ol mas traim long lusim dispela kain pasin.

Sapos ol i go het na mekim dispela kain pasin yet long makim ol ovasis misineri i go insait long opis bilong bisop.

Ol arapela brata na susa bai tok olsem Katolik Sios i laik promotim wok bilong waitman insait long Kantri.

Na i no laik strongim wok bilong ol asples pater.

Dispela pasin mas stap. Mipela ol pater bilong PNG i no laik long sindaun na lukim ol waitman misineri tasol i go insait long dispela opis bilong Bisop.

Yumi mas mekim wanpela samting hariap long stapim dispela.

Na i no ken sindaun tasol long lukim "Deus ex Machina" mekim disisen, we yumi yet sapos long mekim.

Fr. Michael Unage
Good Shepherd College
Banz-WHP

Yangpela man mas senisim Sir Pita

Dia Edita,
MI WANPELA grasrut man. Mi laik autim tingting bilong mi long ol pipel bilong Maprik long Palamen Memba bilong ol Sir Pita Lus.

Mi lukim olsem Maprik i gat planti yangpela saveman na savemeri i stap. Tasol long olgeta ileksen, ol bai votim Sit Pita tasol.

Mi nogat belhevi o kros tinting long Sir Pita.

Tasol long tingting bilong mi, mi lukim olsem wanpela yangpela blut i mas kisim nau ples bilong Sir Pita.

Bikos olgeta taim em save bikmaus tumas long Palamen. Na sakim liklik toktok bilong ol arapela Palamen Memba na Spika. Dispela i no gutpela pasin tumas.

Nau insait long dispela nupela gavman, em bai mekim wankain pasin yet.

Grasrut Man
Badili
MOSBI

Ol tisa i no save go long ol bus skul kwik

Dia Edita
MI WANPELA mangi Menyama insait long Morobe Provins nau mi stap long Biala Wes Niu Briten provins.

Mi laik autim wari bilong mi olsem. Ol tisa long Morobe provins i no save mekim wok stret. Bikipela bel hevi bilong mi em olsem, ol bos i no save salim ol tisa i go kwik long bus skul olsem Menyama, Kabum na ol planti bus skul. Dispela hevi save mekim na mipela ol skul mangi i no save kisim gut save. Plis ol bos long edukesen opis, traim na salim ol tisa i go pastaim long ol bus skul na bihain long ol taun skul. Mi wanpela skul mangi tasol

no gat tisa na mi raun i stap long Biala i stap.

Ol tisa mas stat tis long Januari. Yupela i stap long pela taim na salim tisa long 7 mun o 8 mun. Na tu yupela salim tol tisa na ol i no kamap long ples bilong wok. Mi i no wan bel long dispela pasin. Sapos ol raun nating orait, yupela ol bos long edukesen opis yupela i no ken salim pot nait mani bilong ol. salim mani long ol tisa i mekim wok stret.

Yu husait laik sopotim, rait tasol i kam long Wantok.

Michael Wosako
UMBA Village
Morobe Provins

Noken bagarapim taun

Dia Edita
MI WANPELA mangi bilong Sauten Hailans tasol nau mi stap long Goroka na mi lukim pasin bilong ol manmeri long Pangia i no strset tumas long ai bilong mi.

Nambawan samting em olsem taim yupela i save dring na spak na mekim nabaut long ol man i no dring lo en.

Na tu yupela i save spak long ai bilong ol

man long strit na long ol pablik ples.

Dispela kain pasin i save bagarapim taun bilong yumi. Sapos wanpela man o meri long Pangia i lukim dispela stori bilong mi na i laik bekim tok orait salem i go long Wantok niuspepa na bai mi lukim.

Em tasol na God i blesim yupela na mi tu.

Tua Lama Walunakisi
Goroka

Papamama i no skulim pikinini gut

Dia Edita,
MI WANPELA boi long Nondugf insait long Westen Hailans provins. Mi lukim ol papamama i no soim gutpela pasin long ol pikinini. Na olsem planti pikinini i save mekim pasin nogut.

Ol pikinini nau i lukim olsem: ol i no gat wok long mekim na ol i mekim pasin nogut olsem; pulim spak brus, stil, repim ol meri, mekim ol planti pasin nogut. Em i asua bilong husat?

Baibel i tok olsem long Epesas 6.4 "Na yupela papama, yupela i no ken bagarapim tingting bilong ol pikinini bilong yupeal na mekim ol i belhat long yupela nogat. Yupela i mas mekim gutpela pasin long ai bilong bikipela, na stretim gut ol pikinini bilong yupela na skulim ol long tok bilong bikipela".


Husat papamama i harim dispela toktok plis lukautim gut ol pikinini bilong yupela. Sapos yu mekim olsem bai yu inap stap gut long haus bilong yu na bai yu inap pilim pen.

Em tasol na God i ken blesim yu husat i harim. Tenkyu

Max Bolu
(Wuri Ngamb)
W.H. Provins



93FM YUMI Redio



Stesen bilong yumi yet

Harim olgeta gutpela program long

93FM YUMI

93FM YUMI Redio

Stesen bilong yumi yet

Harim olgeta gutpela program long

93FM YUMI

93FM YUMI Redio Stesen bilong yumi yet Harim olgeta gutpela program long 93FM YUMI

- * Olgeta lokol sing sing, na ol musik bilong bipo yet
- * PNG Motors prais bilong kes krop
- * Yamaha Provinsel weda ripot
- * BSP liklik bisnisan ripot
- * Pepsi lunch hour rikwest
- * City Pharmacy Lukaut bilong bebi
- * Post (PNG) Ron bilong ol Sip
- * Ela Motors kantri kaundaun
- * American God
- * Sande Gospol so

Em rait redio stesen ikamap
pinis harim long tok ples bilong
yumi yet, 93FM YUMI

Salim rekwest i kam long: YUMI request

Locked Bag 93
Port Moresby, NCD
Fax: 320 1995

PNG FM PTY. LTD.
Trading as
NAUFM and YUMI FM
P.O. Box 774,
Port Moresby,
Papua New Guinea
Ph: (675) 320 1996
Fax: (675) 320 1995

**WANTOK**

PH: 325 2500 Miri Aiori Ext. 214, Jeffrey Maliou Ext. 215, Jack Mahuru Ext. 217

PUBLIK NOTIS

**DEPARTMENT OF TRANSPORT & WORKS
OFFICE OF THE DIRECTOR**

PABLIK NOTIS

LICENSING OF HEAVY VEHICLE ACT CHAPTER (367)

Mipela i laik tok save olsem Nesenal Len Trensport Bod i kisim pinis ol dispela aplikesen husait i laik kisim laisens na ronim ol haiwe ka long ol rot insait long Nesenal Kapitel Distrik na Hailans Haiwe.

NAME OF APPLICANTS		NUMBER OF LICENCE APPLIED	
(1)	Amado Cano, Mabuhay	Pty Ltd	one (1)
(2)	Belsaw Forest Resources	Pty Ltd	one (1)
(3)	Mabarasa Plant Hire	Pty Ltd	one (1)
(4)	Niugini Transport	Pty Ltd	seven (7)
(5)	Mountain Transport	Pty Ltd	two (2)
(6)	Hi --- Lift Transport	Pty Ltd	one (2)


Long Lo bilong bikpela ka laisens ekt (Chapter 237), 1997 Nesenal Trensport Bod i askim olgeta manmeri long givim tingting bilong ol long ol dispela aplikesen i stap antap.

Salim komplain bilong yupela i kam long Bod, namel long 14 de bihain long toksave.

The Chairman, National Land Transport Board
P O Box 1489, PORT MORESBY,
National Capital District

MICKY TAMARUA, Director, office of Transport

**OL DAIREKTA BILONG BOD
NA OL WOKMAN
BILONG**



WORD PUBLISHING COMPANY PTY. LTD.

I Givim bikpela tok hamamas i go long

Most Rev. BRIAN JAMES BARNES, OFM, DD, MBE,

na ol

Katolik pipel bilong Mosbi Asdaiosis
long de em bai kamap

Katolik Asbisop bilong Mosbi.

**Holi Spirit i ken kapsaitim Grasia bilong en
antap long yu na ol lain bilong yu.**



CAMBRIDGE *Rugbi Lig Nius*



**“Planti
lig
eksen i
pinis
nau”**



CAMBRIDGE



GOVERNMENT WARNING. SMOKING IS DANGEROUS TO HEALTH.

Bombers mas was gut long Muruks

TINGTING hait bilong Lae Bombers long stap insait long fanel na winim SP Inta-siti kap i strong tru. Ol bisnis haus long Lae tu i gat wankain tingting. Tasol dispela driman bilong ol nau i stap antap long taim bom bihain long Kundiawa Warriors i waraim ol long las wik Sande long Lae.

Planti lain long Lae siti i toktok raun olsem dispela gem em bilong ol Lae tasol dispela kain pasin bilong lukim trai lain na guria nating i mekim na ol i lusim planti bal long eria bilong birua. Kain samting olsem fowet pas, leit pas na tambim bal i as bilong ol i lus.

Sapos ol i tingting strong long winim dispela kap long seken taim, ol woken wokim ol dispela kain man guria pasin. Ol mas katim daun ol asua na taitim ol banis bilong ol.

Ol bai pilaim Mendi Muruks long fanel pilai-ov dispela wiken long Minj. Tupela wantaim i gat ol gutpela namba long win na wanem tim i wokim liklik pekato bai win. Mendi i gat man olsem Raymond Karl, Narde Yer, Samuel Pinpin, Cedric Kengi long frantlain na kepton Ruben Ruing, Anton Mal, Timon Mosembuya na David Ako long beklain. Ol bai i no inap isi-isi long ol mangi bilong siti.

Long sisen ol i winim ol pinis na dispela kain stail bilong Bombers i



• Eksen insait long Mosbi ragbi lig resis.

no nupela long ol.

Bombers, aninit long lukaut bilong David Glipu na Petrus Thomas, Andrew Norman, Philip Erike long beklain, Simon Kundi,

Eddie Mark, Brown Wilby, Peter Dai na Lukas Daniel long frantlain bai traime long brukim banis bilong ol birua klostu klostu. Sapos ol Muruks i no was gut, skoring

masin Norman bai pasim dua bilong ol.

Wankain pasin, sapos ol manki bilong grin-siti i no was, Muruks bai rausim bom gen.

Lig ripot bilong las wiken

Kundiawa slekim bom bilong Bombers long Lae

SPEAR Kundiawa Warriors i rausim na krungutim bom bilong Lae bilding na Kontraktas (LBC) Bombers 24-16 long namba 14 raun bilong SP Inta-siti Kap resis na sem taim kisim SP Inta-siti maina primiasip taitel.

Klostu long pinis bilong pila taim Warriors i lid 18-16, huka Mogi Dul i putim wanpela tra. long kona na gutpela kik bilong seken ro Ezekiel Ben i pasim wok olgeta. Dispela i wanpela strongpela gem we tupela tim wantaim i min bisnis long ran insait long fanel. Wanpela pilaia bilong Warriors, refri i salim em i go aut long wanem em i wokim wanpela spia takel long hap bek bilong Bombers Gilbert Joseph we refri i no wanbel wantaim em. Dispela i givim strong long ol mangi Simbu long pilai strong. Bekim bilong dispela Senta Robert Atep i setim Winga Charlie Ombi long putim pes trai long kona. Kik i no gutpela na bihain liklik Bombers i bekim wantaim trai long han bilon fulbek Petrus Thomas.

Intasens Bobby Mangobe na senta Randall Kaupa i putim skoa na bringim skoa i go antap olsem 14-4. Tasol prop Simon Kundi i bekim taim em i join wantaim ol beklain na soka i sanap 14-8 long hap taim.

Long seken hap, tupela tim wantaim i hatim skin. Ol fowet bilong Bombers olsem Kundi, Peter Dai, Eddie Mark na Lukas Daniel i ron strong go na bihain rausim bal i go long ol beklain olsem David Glipu, Andrew Norman, Philip Erike na Thomas. Tasol ol dispela muv vilong beklain i no wok. Olgeta taim ol Kundiawa i bagarapim plen bilong ol. Kepton na prop Wamil Gul, husat i kisim man-ov-mets i givim traipela han long brukim banis. Ezekiel i helpvim Gul na Dul long rausim bal i go long stail hap-bek Vicky Moses, Atep, Mangobe na Kaupa long wokim olgeta muvs bilong ol. Moses i putim wanpela liklik kik na Mangobe i ron, kisim na putim trai long kisim skoa i go antap 18-8. Tasol ol boi Bombers olsem Bill Kissam na Darby Joseph i kisim skoa i go klostu 18-16. Long dispela taim, gem i stap long han bilong olgeta husat tim i soka bai win. Olsem na Dul i rausim ol hait toktok bilong Lae long bomim ol na putim trai na bringim skoa i go 24-16.

Long ol narapela pilai, Madang Marlins in soim pes long Lae na Goroka Lahanis i kisim tupela poin na hangamapim but. Wankain stori long Minj, Mt Hagen Eagles i kisim tupela poin bihain long Islands Gurias i no kamap long fil. Long Port Moresby, Mendi Muruks i winim City Cowboys.

Royals bagarapim sindaun bilong Divers

JAMES SAKUL i raitim

BANZ Lig i stat gen long las wik Sande bihain long kompetisen i bin stap pilai inap 2-pela wik.

Dispela i bin bihainim wanpela hevi namel long Banz lig wantaim Papua Niugini Ragbi Futbal Lig (PNGRFL).

Taim President bilong Banz lig, Mista John Kumie i stretim toktok wantaim Jeneral Menesa bilong PNGRFL Martin Adamson long Hagen long wanpela wokabaut bilong em long lukluk raun long stretim wankain hevi wantaim ol narapela lig sentas long dispela hap.

Ragbi lig nius i painim aut olsem PNGRFL i saspemim Banz lig tasol ol i rausim gem na nau bai Banz lig i gat fanel na sempion tim bai i go tek pat long Cambridge Cup.

Maski dispela hevi i stap, Banz Ragbi lig graun i pulap wantaim ol pilaia, lig sapotas na spekteta las wik Sande husat i bin go insait long geit long sapotim tim bilong ol.

Long men gem las wik ol manki nogut wantaim blu unifom, Royals i no givim wanpela sans tru long ol bois bilong tromoi huk long wara Wagi, Divers. Taim ol i nekim ol wansait stret na bagarapim sindaun bilong 22-0.

Bihain tasol long kik-ov, long sevenminit mak referi Johnny Skaul i no amamas long wanpela pilaia long 15 mita bilong Divers na givim penalti i go long Royals. Hapbek na pilai meka bilong ol Kevin Noah i kisim kik na painim namel bilong tupela gol pos stret na Royals i go pas 2-0. Dispela i strongim tingting bilong ol na Royals i bomim stret lain bilong Divers wantaim ol strongpela man olsem Thomas Tai long prop, John Bata,

Robin Hagen, Peter Singal na Wamug Paulus. Ol i mekim save i go na yangpela prop John Bata karim tupela Divers pilaia wantaim i go slip long lain aninit long ol gol pos stret. Kik bilong Kevin Noah painim mak na ol Royals i go antap moa 8-0

Ol Divers i traime painim sampela rot na brukim banis bilong Royals wantaim ol man olsem Robert Bii, John Kawage, Peter Alu, Peter Masa, Tolak Mondia na Mek Guan tasol i no inap. Ol plisman i tingting strong long givim kiau stret long Divers na strongim banis bilong ol olgeta olsem brik wol.

Long arere bilong pes hap stret stail mangi Kevin i bek ap gut tru long wanpela gutpela ron Robin Hagen i kamapim na i go raun long lain bilong Divers. Kik em yet kisim i kamap gutpela na nau ol i go antap moa 14-0. long hap taim mak stret.

Long seken hap ol Divers i traime long kamapim sampela strongpela pilai tasol ol plisman i gat narapela plen na blokim olgeta sens tru bilong Divers. Ol fawets bilong ol i paia lait olgeta na taim bal i go long ol beklain manki olsem Kevin, Peter Singal, David Binz, Joe Bakme na Paul Amal, ol i salim bal i go i kam na mekim ol Divers i sotwin olgeta.

Taim ol Divers i sotwin i stap narapela strongpela na yangpela fowet bilong Royals Peter Singal i wokim ova lap long beklain na bihain long wanpela beklain muv em i dastim i go raun long lain bilong Divers. Dispela taim kik bilong Kevin Noah i no kamap gut tasol ol i go pas yet 18-0

Long pasim wok olgeta Peter Gal long lep wing i painim lain bilong Divers. Kik bilong Kevin Noah i kamap gut gen na ol i go antap 24-0 long pasim wok olgeta.

Lig dispela wik

● Toktok bilong Papua Niugini ragbi futbal lig (PNGRFL-Supa Lig) na Nesenel ragbi lig (NRL-ARL) long kam bung wantaim na kamapim wanpela kompetisen long neks yia i wok long ran gut. Siaman bilong Vipers PNG i bin tokim Winfil Spot program bilong EMTV olsem i gat planti samting long straksa bilong lig, tupela bodi wantaim mas wanbel long stretim.

Wanpela bilong ol dispela samting, tupela bodi mas wanbel long en em: seleksen straksa bilong Kumuls tim. Em tok olsem bipo long i go insait long PNG Kumuls, ol pilai mas mekim nem insait long Vipers pastaim. Dispela bai redim ol long pilai insait long bikpela gem olsem, wol kap salens long 1999. Nau yet, tupela bodi wantaim i bung yet long stretim olgeta toktok. Ol bai traime long stretim olgeta samting bipo long Kembris kap salens i kik ov long Oktoba dispela yia. Bikos ol tim bilong NRL na PNGRFL bai bung na pilai long dispela taim.

POM LIG:

● Kwinslen sanel 9 kompetisen i kam pinis long arere bilong en na olgeta Vipers pilaia i go bek long sapotim wanwan klap bilong ol.

Long las wiken, tupela tim husat i bin pilai long gren-fanel las yia, Defence na Hawks i bin lokim hon long wanpela strongpela pilai tru. Long riplai bilong gren fanel las yia, tupela tim wantaim i bin pilai gut tru na dro 16-16.

Hawks, husat i bin pilai gut tru na stap long mak bilong rausim tiket bilong Defence i bin mekim wanpela liklik paul pasin tasol long lukim James Miviri tas daun long trai lain bilong ol.

Dispela trai i bin kam taim, biknem fowet bilong Vipers, Raphael Mua i ov-lodim wanpela stail bal i go long winga Miviri, husat i bin stap fri tru. Taim Miviri kisim bal, em siksti abusim trai lain long sevim laip bilong Defence.

Dispela i bin wanpela gem tasol bilong Mutrus Pot Mosbi ragbi kompetisen. Ol arapela Agret tim i no bin pilai. Olgeta i bin malolo long fainels gem bilong ol dispela wiken.

MOROBE COUNTRY LIG:

● Omili spot graun i bin pas las wik Sande taim selekt sait bilong Morobe Country ragbi lig; Mutrus Kundus i bin pilai wantaim Goroka Nokondis. We Nokondis i bin rausim tiket bilong Mutrus Kundus 24-16.

Kundus, husat i no bin i go pilai long Nondugul long nesenel ragbi lig tonamen i bin trening klostu olsem tripela mun olgeta. Tasol hat wok bilong ol long trening i no karim kaikai taim ol bungim ol boi kol ples Goroka.

Tupela tim wantaim i bin putim kamap wanpela strongpela pilai tasol, ol yangpela pilaia bilong Kundus i no stapim ol traipela traipela manki bilong Nokondis.

Kain strongpela ran bilong Atu Isoi i baim ol boi bilong em aut long maus bilong Mutrus Kundus.

Laspela man tasol i stap

*Nupela blut i helpim rausim
olpela blut, taim Eels kirap*

I GAT wanpela faiv-man ben i stap long Parramatta, husat save kolim ol yet, "Survivors" - olsem tru ol i pinis long wanpela woa na kam stap.

Troy Campbell, Chris King, Justin Morgan, Chris Lawler na Dave Woods i bin joinim Parramatta wantaim arapela 42 pilaia long 1995. Taim klap i no bin i gat ol gutpela pilaia. Tasol nau, olgeta lain i go pinis na dispela faivpela man tasol i stap.

Long dispela taim, klap i bin bungim planti hevi tru na ol bikman bilong klap i bin mekim olgeta samting long strong bilong ol long ranim klap.

I tru olsem Parramatta i bin pilai gut tru na winim olgeta 11-pela gem bilong ol long dispela sisen bihain long lusim sikspela gem. Ol i no inap lus ting ting long dispela taim ol i bin bungim taim nogut tru. 1995 sisen i bin wanpela bilong ol taim nogut tru Parramatta i bin bungim. Dispela i bin wanpela rabis sisen bilong Parramatta long taim klap i bin stat long 1960 i kam. Ol i bin lusim wantaim 120 trais, 690 poins... na long sevenpela taim olgeta, ol i bin lus long 40 poins na moa. Na tu long dispela taim, ol bin winim tripela gem tasol.

I gat moa long dispela stori nogut bilong Parramatta. Ol sapota bilong ol i lusim

Parramatta olgeta. Namba i pun-daun long 10,472 long 1994 i go daun olgeta long 8251. Taim ol lusim olgeta pilai bilong ol, bikpela sori na kra i pulap long bel bilong ol na ting ting bilong win i bin gro strong tru insait long ol.

Hatwok fowet, Chris Kings i tingting i go bek long dispela taim nogut bilong ol na tok olsem sapos wanpela man tingting dispela taim olsem Eels bilong 95 i nogut, ol mas tingting gut pastaim.

"Tingting na leva bilong mipela i bin stap long dispela taim nogut," King tokim RLW. "Olgeta pilaia i bin mekim samting long strong na save bilong ol long helpim na strongim club i ken kisim bek gutpela nem bilong em."

I no olgeta man i bin lukim taim nogut bilong Parramatta long wankain rot olsem fowet Justin Morgan i tingting i go bek.

"Taim mipela i go long promotim klap, ol man i singaut antap long mipela na laik paitim mipela," em tok. "Ol i tok nogutim mipela na askim wanem taim tru bai klap baim sampela gutpela pilaia."

"Tasol gutpela samting nau em dispela ol manmeri i lukim pinis klap i senis olgeta na ol stat long


singaut na amamas long mipela.

Morgan i gat tupela memori long 95 sisen bilong Parramatta. Long wanem, long dispela taim em i bin bal-boi tasol na nau i pilai olsem wanpela ekspirians pilaia.

"Nau yet, mi amamas tru, bikos long dispela taim mi bin pilai 20 fes-gret gem na mi kisim moa ekspirians long taim nogut bilong laip," em tok. "Olsem wanpela boi bilong klap yet, mi lukim olsem dispela i bin wanpela gut-taim bilong mi."

Aninit long lukaut bilong kosa Brian Smith, ol boi Eels i statim ken wanpela gutpela nem. Ol laik kirap gen long matmat na gro i go bikpela tru. Long wanpela gem i no longtaim i go pinis wantaim Newcastle, ol i bin kam long baksait tru na winim. Dispela i soim olsem ol Parramatta i min bisnis na ol narapela ARL klap mas was gut.

Long 1995, pait bek long seken hap i no bin kamap liklik. Na tu i no wanpela samting Parramatta save mekim bipo. Dispela kain rot em bilong Brisbane na ol arapela biknem tim. Long wanpela gem namel long Brisbane Broncos bipo (95), mipela i bin stap foapela poins tasol long baksait. Tasol long laspela wisel, ol Broncos i bin bagarapim mipela gut tru wantaim 40-14. Dispela em wanpela gem mipela i no inap lus ting ting. "Tasol long dispela taim, mipela i gat bilip



• Troy Campbell bilong Parramatta i putim ai long fainel.

long mipela yet nau bikos mipela i ken win... mipela i gat gutpela pilaia na tu mipela i gat teknik."

Troy Campbell i bin kisim wanpela leta i kam long Sydney City long go pilai wantaim ol. Tasol em i bin les. Tripela arapela klap tu i bin askim em long go joinim ol tu. Olgeta taim ol klap rait o ringim em long em i joinim ol, em i bin les. Bikos em i no laik lusim Parramatta. Nau, em amamas tru bikos em stap yet wantaim Parramatta.

"I gat bikpela filing olsem mipela i ken go olgeta long fainels," em tok. "Em gutpela bikos, aninit long lukaut bilong Brian Smith, olgeta samting i wok long ran gut na oltaim em save

tokim mipela olsem i nogat samting olsem lus i stap long ragbi."

"Wantaim ol gutpela skul tok bilong Brian, mipela redi tasol long fainels."

I tru olsem, hau mipela i bin pilai long 95 i wok long stap yet long het bilong ol manmeri na pilaia. Dispela i wok long lus isi isi. Campbell i tingting i go bek long dispela taim nogut bilong Eels tasol kain win bilong ol long dispela sisen i laik rausim dispela memori long het na ting ting bilong ol pilaia.


"I bin hat tru, bikos mi bin kam aninit long tupela yia kontrak na taim mipela lus, mi mas kisim olgeta pen," Campbell i tok. "Mi no laik long stap nating long sait lain o pilai sotpela taim tasol na kisim moni. Dispela i no gutpela. Mi les long stilim moni bilong klap," em tok. "Olsem na oltaim, mi save suim het long trening na traim long mekim bel bilong kosa amamas na em i ken putim mi pilai ful taim."

Campbell i amamas long stap yet wantaim Parramatta bihain long taim nogut bilong klap long 95 sisen. Em i bin stap long olgeta gem Parramatta i bin winim long dispela taim. Olsem na Campbell i gat bikpela amamas tru.

Chris Lawler tu em wanpela bilong ol dispela lain husat i stap yet bihain long dispela taim nogut bilong Parramatta long 1995. Em i bin pilai 22 gem pinis long las tupela sisen na em save karim kala bilong Parramatta raun long olgeta pilai. em wanpela pilaia, bai yu no inap painim pes bilong em long pilai graun.

"Mi no laik mekim nem bilong Parramatta i go daun. Parramatta mas oltaim winim ol gems bilong ol long dispela sisen," Chris tok. "Olsem na long rives gret, mi bin strongim tru sait bilong mi na mekim Parramatta amamas long sisen go pinis."

- RUGBY LEAGUE WEEK



• Chris Lawler (raithan) na Justin Morgan (lephan) bilong Parramatta i stailim pas bilong ol long wanpela pilai bilong...





Inta Siti resis i go insait long Semi fainel

...Warriors, Eagles, Muruks na Bombers bai traim strong bilong ol

KUNDIAWA Warriors nau stap olsem mina primia bilong dispela yia SP Inta-siti kap resis bihain long ol i bin winim Lae B52 Bombers 24-16 long Lae las wik Sande.

WATSON GABANA i raitim Tupela arapela tim bilong hailens rijen, Maut Hagen Eagles na Mendi Muruks joinim Bombers na

Warriors long stap insait long fainel bilong dispela yia SP Inta-siti kap resis.

Eagles husat pinis long wankain poin olsem Warriors long 19 poin bihain long kisim isi 2 poin taim ol Guria i no soim pes long Sande. Tasol gol egens na fo i soim olsem Warriors i gat 103 gols moa long

Eagles long kisim dispela mina primia taitel.

Planti samting i no bin kamap gut long laspela raun bilong pilai. Long Lae, Goroka Lahanis i bin kisim isi 2 poin taim Madang Marlins i no bin soim pes. Wankain samting tu i bin kamap long Minj namel long Eagles na Guria.

Olgeta pilaia na menesmen bilong Guria i bin widro long taim PNGRFL i bin sansim ol K250 long hevi tupela wik i go pinis long Kokopo.

Jeneral Menesa bilong PNGRFL, Martin Adamson i no painim wanpela gutpela as, watpo na dispela kain samting i bin kamap long pinis bilong sisen. I tru olsem em i

bin kisim tok save i kam long Rabaul olsem Guria i no inap kamap long dispela gem namel long ol na Eagles.

Kosa bilong Rabaul, Dennis Reynolds i lusim ol manki bilong em stap long Kokopo na i bin go pilai gof long Kimbe stap. Olgeta menesmen na pilaia i bin wanbel na pasim tok long i no inap pilaim dispela laspela gem bikos long sans ol kisim long PNGRFL.

"I sori tru long lukim Rabaul Guria i lusim sans bilong ol long stap insait long fainel bihain long ol mekim gut tru long pilai bilong ol," Adamson i tok.

Long wanpela redio intaviyu, Reynolds tok olsem em bai kisim dispela samting i go long kot. Em

tok ol kisim pinis wanpela lo kampani, Wayner Shand & Lawyers long kisim pes bilong ol long kot.

Dispela olgeta toktok i go het yet. Tasol taim bilong fainel i kam klostu pinis. Foapela tim, Warriors, Eagles, Muruks na Bombers bai bungim het long Minj dispela wiken long painim aut, husat bai go insait long gren fainel long tu wiks taim (31-Ogas).



Bombers, wanpela tim tasol bilong nambis bai traim strong bilong ol Muruks na tupela tim bilong haus-man; Warriors wantaim Eagles bai bungim pes na salim han i go i kam long Minj dispela wik Sande.

Wanpela bilong ol bikpela samting long histri bilong Minj, we ol

manmeri long olgeta hap bilong hailens na Lae bai pulap long Minj lig graun long sapatim feveret tim bilong ol pilai long hagapim SP Inta-siti sempion long nek bilong ol.


Wina bilong Eagles na Warriors bai go wetim gren fainel. Lusa bai wetim wina bilong Muruks na Bombers long semi-fainel long neks wiken.

Lusa bilong Muruks na Bombers bai hagapim su dispela wiken. Olsem na tupela tim ya (Bombers na Muruks) mas mekim olgeta samting long strong bilong ol long kamap wantaim win. I luk olsem tim husat kamap wantaim planti paul pilai bai lukim ol yet stap long mak bilong go long ples bilong ol wantaim wari.



• Bill Kisam (lephan) na Phillip Erickel bai helpim Bombers dispela wiken egensim Muruks.







• Roy Karang bilong Yunivesiti i soim liklik stail bilong em.



• Roberto Cotersi bilong Yunivesiti i laik train kipa bilong Ela Yunited insait long reals bilong Mosbi soka. Yunivesiti na Ela Yunited i bin dro 0-0. Aninit: Oi Bears na Koboni hatim skin long traipela hot san bilong Mosbi long pilai Aussie Rules.



• Aussie Rules eksen namel long Bears na Koboni long Mosbi. Poto: Harry Kombega. Raithan: Rosen Matangia laik stapim birua bilong em.



Ol pilaia i bikhet tumas long Goroka soka resis

JOHN SUPA i raitim

OL BOI Kalibobo i bin bagarapim sindaun bilong Guria 2-1 long wanpela bilong ol strongpela pilai las wik Sande long Goroka soka resis.

Long Sarere, ol meri Kalibobo i bin gat long haus wantaim bikpela amamas taim ol rausim tiket bilong Rapatona long wankain skoa olsem ol man bilong ol. Wantaim gutpela bal kont ol long fowet: Irene John, Jean Ponga na Nila Nongkas i bin stap olsem frant lain long helpim ol meri Kalibobo long rausim ol susa bilong Manus. Irene na Nila i bin putim wanpela wanpela gol long mekim tim bilong ol go long haus wantaim amamas.

Taim gem bilong ol meri i bin bin gut ol man i bin bungim sampela liklik hevi. Long prima divisen, pilai namel long Telikom na Elcom i no bin kamap gut tumas. Refri i bin salim tupela pilaia i go aut long fil taim tupela

tanim soka fil i go boksing ring na salim han i go i kam. Tupela pilaia: Franky Lasu bilong Telikom na Kepe Elshenower bilong Elcom bai lukim judiseri bikos long dispela pasin ol i bin mekim. Mausman bilong Goroka soka asosiesen, Dimirit Mileng tok olsem tupela pilaia wantaim i no inap pilai tupela wiken. Dispela i bihainim lo bilong PNGFA.

Pilai namel long Guria na Kalibobo i bin gat hevi bilong em yet tu. Long wanpela taim, kros i bin kamap na klostu tru ol pilaia i tromoi han i go kam. Tasol sampela gutpela spot man i bin stapim.


I Tru olsem Kalibobo i bin win, het kosa bilong ol: Michael Kapari i tok olsem em i no amamas long we refri i bin ranim dispela gem. Em tok olsem refri i no bin mekim gut ol disisen bilong em. Olsem na ol pilaia i bin kisim strong long dispela na mekim samting long laik. Michael tok olsem sampela taim, ol pilaia i go pas long ranim gem na i no laik harim tok bilong refri.

Ol manmeri long dispela apinun i bin ges pinis long husat bai win. Tasol olgeta samting i bin sans taim straika bilong Kalibobo, Kenneth Bade i pairapim wanpela pawaful gol long go pas wantaim 1-0 skoa lain. Tasol i no longtaim, pilaia kosa bilong Guria, Paul Fiambawe i salim wanpela bal i go painim net long lok 1-1 go inap long taim bilong malolo.

Taim ol kam bek long seken hap, Guria i no moa tingting long pilai olsem tim. Ol mekim planti wan-men pilai. Dispela i givim sans long ol boi Kalibobo, husat i wok olsem wanpela tim. Dispela kain gem plen i bin karim kaikai taim lef winga, Timothy Thomas painim net long namba tu gol bilong Kalibobo.

Ol Guria lukim olsem ol bai lus na traim olgeta strong bilong ol long pait bek tasol taim i sot.

Long arapela gem bilong prima divisen long las wiken; Telikom rausim trausis bilong Elcom 2-1, Morobe United bagarapim Murat 3-2 na Goroka United winim Rapatona 3-1.



• Pilaia bilong Popondetta i kalap long stapim bal long nesanel volibal resis long Madang. Ol i no bin strong na NDC i bin kisim taitel bilong volibal sempionsip long dispela yia.

Guria go pas nau long PMSA soka resis

WATSON GABANA i raitim

GURIA i go pas nau long Pot Mosbi soka resis bihain long winim tupela gem bilong en long las wiken.

Kompètisen lida pastaim, IC Fund Yunivesiti i bin traim strong tru long stap antap tasol kain strongpela salens bilong ol arapela tim i stapim ol long i no ken go moa.

Bihain long wanpela strongpela pilai long Sarere, Guria i rausim trausis bilong ol woda (Tarangau) 3-0. Na long Sande, wanpela stail gol bilong John Foro givim Guria tiket bilong i go pas long PMSA soka resis.

Long dispela gem name long Blue Kumuls na Guria, tupela tim wantaim i bin kamapim gutpela pilai tru. Ol sanapim strongpela banis na salim ol straika bilong ol limlimbur long

kompaun bilong birua klostu klostu. Ol mekim olsem i go na bihain long wanpela bal lus long han bilong Abiang Kera, gol kipa bilong B/Kumuls, yangpela sumatin pater bilong Solomon Ailan, John pairapim umben long wanpela gol, planti sapota i bin kolim olsem "wol kap gol". John i putim lef but bilong em baksait long bal long lukim bal i singsing antap long net autsait long 18 yats bokos.

Ol yangpela blut bilong Gordens bareks i no bin surik long dispela. Wantaim gutpela sapot pilai long namel, wantaim eksperiens bilong Nasa Wangu na bek lain, Brian Tani. Ol traim olgeta save na teknik ol gat long bekim dinau tasol olgeta samting i no wok aut gut long ol.

Ol boi Guria i lokim beklain na salim ol fowet bilong ol olsem Geno na Aron Guwae krunkutim kompaun bilong ol plisman

klostu klostu. Tasol hatwok bilong ol i bin wara nating.

Tupela tim wantaim i bin paia lait taim ol kam bek long malolo. Ol plis man i bin hangere tru long skoa tasol ol fulbak bilong Guria i no givim liklik spes long ol. Mekim olsem i go inap long pinis bilong pilai. Dispela wanpela gol tasol long fes hap i givim Guria tiket bilong stap antap nau long PMSA resis wantaim 37 points. IC Fund Yunivesiti i ron seken wantaim 36 points.

Nau yet, ol manki Yunivesiti na Babaka i stap long ful trening long redim tim bilong i go pilai long Madang long nesanel klap sempionsip long Independens wiken. Ol kosa bilong tupela tim wantaim i bin tokim ol boi bilong ol long pilai strong long olgeta gem bilong ol. Dispela i bin redim tim long salensim sampela arapela tim husat bai kam pilai long arapela senta long dispela sempionsip.



• Arnold Mera i soim stail bilong em long tenis. Arnold em i wanpela pikinini husat i stap long wanpela progrem bilong pikinini spot long pilai tenis. Dispela pilai tenis i gat bal na bet we bai ol i mekim plastik inap bilong mangi long pilai wantaim.

51 Explosives stapim Kalibobo long win

DICK SORARIBA i raitim

51 EXPLOSIVES kam bek long laspela minit long painim taket na stapim Kalibobo long UPNG Somare soka resis las wik Sande.

Explosives i bin wok hat tru i go na straika Phil Gas i kikim wanpela kona i kam na i go insait long gol mak bilong Kalibobo long droim dispela strongpela gem bilong dispela apinun 1-1. Dispela gol i bin kamap bihain long wanpela winga bilong Kalibobo traim long abrusim birua na salim bal i go karapim sait lain long kona kik. Taim Gas kisim dispela kona kik, bal i flai i kam na i

go insait long gol mak, we gol-kipa Haro Brad i bin leit long stapim.

Tupela tim wantaim strongim sait bilong tupela na laik mekim olgeta samting long stat bilong gem. Ol salim bal i go i kam na traim long skoa tasol tupela sait wantaim sanapim strongpela waya banis. Mekim olsem i go na straika bilong Kalibobo, i kisim bal long namel lain, trikim olgeta difenda bilong Explosives long painim umben.




Taim ol skoa pinis, ol manki Gaun i sanapim strongpela brik wol long baksait na stapim ol birua i kam limlimbur long kompaun bilong ol. Tasol dispela i no stapim raits bilong ol Explosives. Kain bikhet manki bilong ol olsem

Eddie Ogomeni na Duddly Yariyari i suim het i go insait long haus man bilong ol manki Madang na laik painim net. Tasol kik bilong ol i no painim taket. Kain pilai bilong gol kipa, Haro Brad i stapim ol Explosives long kisim isi gol.

Tingting hait bilong ol manki Gaun long winim dispela gem isi i no bin karim kaikai. Ol boi 51 Explosives i kam bek strong tru long seken hav na pait hat tru i go inap long laspela minit taim ol lukim kaikai bilong hat wok bilong ol.



WANTOK SPOT



Ripot bilong 5th Mini Saut Pasifik Gem: Pago Pago (Westen Samoa)

WATSON GABANA i raitim

Papua Niugini netbal tim rausim Westen Samoa 41-38 long namba wan pilai bilong ol aste. Na faivpela liftas bilong yumi pait nau long winim medel.

Tasol taim ol pilaia bilong PNG kik ov gut wantaim 5th mini Saut Pasifik gem wok bilong painim moni long bekim ol dinau na pinisim ol arapela fi bilong dispela pilaia i wok long go het hia long Mosbi.

Opening seremoni bilong 5th mini Saut Pasifik gems long Pago Pago (Westen Samoa) i bin kamap long Tunde dispela wik wantaim moa long 2,000 manmeri i kam long 19-pela Saut Pasifik kantri.

Namba bilong PNG pilaia na ofisel, husat bai stap long dispela mini gem em 81. Olgeta i kamap pinis long Pago Pago na stap long Kanana Fon Theological Viles.

Laspela grup long kamap long Pago Pago em ol netbal pilaia tasol aste ol stat gut long winim namba wan gem bilong ol. Ol bai pilaim Cook Ailen tete.

Ol manmeri long Pago Pago i bin mekim bikpela welkam tru long ol pilaia bilong yumi taim yangpela weilifta, Pearce Wesley karim flek bilong PNG na wokabout i go insait long stadium long taim bilong opening seremoni.

Tim spirit i stap antap tru na olgeta pilaia bilong yumi lukluk tasol long kisim planti medal i kam long PNG.

Namba bilong ol pilaia nau i go long Pago Pago i liklik tru long arapela taim PNG i bin salim tim i go long wanpela mini o mein Saut Pasifik gem.

Dispela samting i kamap bikos long hevi bilong moni, Papua Niugini spot federesen i gat long salim tim. PNGSF i salim tim we i ken winim medel.

Taim ol tim bilong yumi redim ol yet long statim ol gem bilong ol long aste (Trinde), Jenerel Sekreteri bilong PNGSF, John Dawanicura i askim raun yet long painim moa moni.

Long Mande dispela wik, SP Holdings, aninit long Pepsi Fun Run kempein, i bin givim PNGSF K60,000 long helpim tim bilong yumi, husat sot yet long K150,000 o moa. Bihain tasol long dispela, Dawanicura i salim wanpela leta i go long Praim Minista, Hon. Bill Skate long kisim moa helpim.

Hap bilong leta Dawanicura i raitim rit: "Olgeta 15-pela netbal pilaia bilong PNG i bin baim rot bilong ol yet long go long dispela mini gem. Na dis-

pela i soim olsem ol pilaia bilong PNG i baim moni long makim kantri bilong ol. Olsem na mi askim PM sapos, em i ken givim K87,750 insait long dispela sotpela taim mipela i ken helpim ol lain bilong yumi kisim nem bilong kantri na stap long hap..."

Minista bilong Home Afeas, Yuth na Women, Hon. Muki Turanupi i tok olsem em bai sapotim Dawanicura long karim dispela askim i go long wanpela miting bilong kabinet. Na tok long helpim PNGSF long dispela taim nogut bilong en.

Dawanicura i no kisim wanpela tok klia long gavman yet. Tasol, Wantok i save olsem Praim Minista, Hon. Bill Skate i promis long PNGSF olsem

em bai givim dispela moni. Em (PM) bai tok aut long Dawanicura tete wanem disisen kabinet mekim long aste. Na sapos em i gat sampela moni long givim Dawanicura, bai Praim Minista mekim bipo Dawanicura i go long Pago Pago nau apinun.

Sekreteri Jenerel tokim ol niusman aste belo olsem, em bai i go long Pago Pago long bungim olgeta pilaia bilong PNG. Tasol bipo long em mekim olsem, Dawanicura mas baim olgeta fi bilong ples PNG tim i go slip long en.

Dawanicura bai lusim PNG tete long 3:15 pm na i go long Pago Pago.

Lukim moa stori neks wik

PMSA kamapim disaplineri komiti long was long refri

POT MOSBI soka asosiesen i kamap pinis wan taim wanpela grup long panisim ol pilaia, ofise na klap husat i no bihain na harim tok bilong refri long taim bilong pilai.

Presiden bilong PMSA, Mark Kelep i bin tok olsem moa long 20-pela mausman bilong wan klap i bin bung wantaim ofis biras bilong PMSA long Mande dispela wik na makim pinis sikspela man long iukluk long pasin ol pilaia, ofisel na klap i mekim long ol refri.

Olpela siaman bilong PNG Wol kap kwalifying oganaising komiti na namba tu siaman bilong PMSA Kuma Aua bai go pas long dispela disaplineri komiti. Ol bai sasim ol pilaia, ofisel na klap husat i mekim klangki pasin long ol refri long taim bilong pilai.

"Mipela kamap wantaim dispela grup bihain long mipela lukim kainkain pasin nogut ol pilaia i mekim long refri bilong mipela," Kelep i tok. "Olsem na mipela kamap wantaim dispela disaplineri komiti long panisim husat ol pilaia, ofisel o klap laik kirapim pait wantaim refri," em tok.


Dispela komiti ba, glasim olgeta tok pait kamap namel long ol pilaia na refri. Mista Kelep tok olsem long bipo planti pilai na klap i bin tok nogutim na traim long kirapim pait wantaim refri tasol nogat wanpela samting i bin kamap. Olsem na dispela taim, ol bai putim was long toktok na pasin bilong ol pilaia na ofisel long olgeta taim bilong pilai.

"Mipela bai putim was long olgeta gem na traim long rekotim wanem samting i kamap insait long fil," Kelep tok. "Ol sikspela disaplineri komiti bilong mi bai bung olgeta Mande apinun na tok tok long wanem samting kamap long wiken. Husat pilaia brukim lo bilong pilai na mekim wanpela samting nogut long refri bai mipela sasim em," Kelep tok.

Ol sikspela man husat i stap long dispela disaplineri komiti em Kuma Aua (siaman), Stiven Lahe (Guria), Stiven Nion (Sobu), George Bukoya (Simla), Joe Turia (University) na Stiven Pelina (man makim refri).

Presiden tok olsem em bai salim leta i go long ol klap husat i no pinisim olgeta fi bilong ol. Mark tok olsem bihain long dispela leta sapos ol tim i no pinisim fi bilong ol hariap, PMSA bai saspenim ol long kompetisen. PMSA i makim pinis tripela refri long go na ranim nesinel klap sempionsip long Madang long Independens wiken. Dispela tripela refri em; Raphael Tsuga, Saleau Sosogan na Job Minan. Ol dispela tripela refri bai joinim arapela refri bilong arapela senta long ranim nesinel klap sempionsip long Madang.

Nau yet, PMSA i askim Spot Komisn long ranim wanpela kos bilong ol refri long pinis bilong dispela mun. Ol saveman bilong Spot Komisn na Nesenel Spot Institut (NSI) bai i go pas long dispela advens refri kos.



Kundiawa Warriors

Hagen Eagles

You get much more than in a 285ml bottle!

In this great new 500ml BOTTLE for only K1.00

THIS MUCH MORE

ALWAYS
RIGHT SIZE
RIGHT PRICE
RIGHT SHAPE

NEW

MT HAGEN SO SPESEL

1997 Mt Hagen So bai liklik

...tasol pulap long tumbuna singsing na bilas



• Ol kainkain tumbuna singsing bai kamap long Hagen So long dispela wiken. Dispela poto soim ol lain singsing grup long Mendi.

LIKLIK taim long plenim bilong Mt Hagen So i mekim na ol pilai we bai i kamap long so bai ino bikpela tumas olsem bipo. Tasol bai i gat planti moa tumbuna singsing long amamasim ol turis husat bai go lukim dispela bikpela de.

BARBARA MASIKE i raitim
M t Hagen So bai kamap long Ogas 16 na 17 long Rebiambut ragbi lig graun.

Presiden bilong Mt Hagen So Sosaiti, Simon Kuk i tok olsem so long dispela yia bai ino bikpela olsem ol narapela yia bikos liklik taim komiti gat long



• Dispela meri Simbu i hamamas long soim bilas bilong ol tumbuna bilong em.

plenim ol progrem bilong so.

Man husat bai opim dispela so em petron bilong Mt Hagen So Sosaiti, Sir Danny Leahy. Mista Kuk i tok olsem ol i askim tu Gavana bilong Westen Hailans, Fr. Robert Lak long stap long dispela bikpela de.

Mista Kuk i tok olsem ol komiti bilong em i salim bikpela tok sori i go long olgeta manmeri olsem ol i no inap kamapim wanpela bikpela so.

"Wanpela samting mi laik tok olsem siaman mipela laik ogenaisim wanpela bikpela so, tasol mipela i sore olsem wanpela liklik so bai i map. Tasol dis-

pela i ker bringim amamas i go long ol manmeri na ol turis husat i redim rot bilong ol go lukim dispela samting we bai kamap long so.

Taim Wantok Niuspepa i askim olsem wanem na so i no stat long redim ol samting hariap, Mista Kuk i tok.

"Mipela ino bin gat inap taim long reisim moni we i ken helpim long ranim so bihain tasol long ileksin," em i tok.

Bikos long dispela ol so komiti i tingting long kamapim kalsarel so tasol, we bai i gat moa tumbuna singsing we ol turis husat i redim raun bilong ol ken go na lukim na amamas.

Sampela ol samting we i save kamap long ol so long bipo, tasol bai i no inap kamap long dispela yia em ol man i kalap long parasut na dispela ples we i laifben i save pilai musik. Dispela ol samting bai i no stap long progrem bilong 1997 Mt Hagen So.

Planti ol bikpela kampani na sponsa husat i save sanapim ol stol o haus bilong ol long so-graun bai i no inap kamap long so, bikos i gat liklik spes. Dispela em bikos ples bilong holim so long dispela yia em ol i senisim i go long Rebiambut ragbi lig oval. Las yia na ol narapela yia Mt Hagen So i

save kamap long Kagamuga So graun.

Mista Kuk i tok ol bai lukluk long kisim samting olsem 30 na 40 singsing grup i kam long dispela kalsarel so.

Sampela ol lain grup husat bai putim kamap ol singsing bilong ol em ol lain bilong Oro, Sepik, Madang na ol lain Mekeo bilong Sentral provins.

Ol lain Mekeo em wanpela lain we i save

bilasim pes bilong ol gut tru wantaim ol stail kala peint.

Planti bilong ol i save putim ol longpela kangal bilong pisin we i gat naispela kala tru.

Mista Kuk i tok olsem bai ino gat ol nupela ol samting bai kamap long so long dispela yia.

Tasol em i singautim ol manmeri long go na lukim ol tumbuna singsing na amamas wantaim ol femili bilong ol.

Em i tok tu olsem bai i gat bikpela sekuriti long dispela so. Ol polis bai stap strong long was na nogat trabel i ken kamap.

Ol lain kampani husat i save givim helpim long so em Pepsi, husat i bin givim K20,000 i go long sapotim dispela bikpela kalsarel so. Las yia Pepsi i bin givim K40,000 i go long sapotim dispela so.

Ol narapela sponsa long so em Rothmans ov Pall Mall, husat i bin givim K11,000. Porgera Joint Vensa i givim K2000 na Turism Promosen Autoriti i givim K5,000.

Mista Kuk i tok olsem kampani Bromley and Manton i bin wanpela sponsa, na ol i wetim samting olsem K20,000 long ol long sapotim dispela 1997 kalsarel so.

PEPSI

welcomes everyone to the **Mount Hagen Show**

PEPSI PEPSI

CAMBRIDGE

COUNTRY SHOW

MT HAGEN SO SPESEL

Tumbuna singsing bilong Momase, Oro na Sentral bai paia-lait long Mt Hagen So

MT HAGEN So long dispela wiken bai paia-lait stret wantaim ol tumbuna singsing grup i kam long Oro, Sepik, Madang na Sentral provins soim stail bilong ol.

BARBARA MASIKE
i raitim

Dispela ol grup bilong nambis bai i go soim kalsa bilong ol na amamasim ol lain turis husat i laik

go lukim Mt Hagen So long dispela wiken.

I gat wanpela grup bilong hailans long Lake Kopyago long Sauten Hailans provins husat bai i kamap long givim samsam na amamas long dispela wiken.

Seketeri bilong Mt Hagen So sosaiti, Elias Kundu i tok bai i gat moa long 40 singsing grup i kam long ol provins long nambis na hailans long amamas insait long dispela Mt Hagen So, we bai i kamap long Sarere, Ogas 16 na Sande, Ogas 17.

Mista Kundu i tok olsem sampela bilong ol dispela grup long hailans provins em sampela ol sumatin long ol skul insait long rijon.

Em i tok tu olsem ol i bin traim long redim rot bilong wanpela grup bilong Mekeo long Sentral provins



• Ol grup bilong Morobe bai stap wantaim ol narapela tumbuna singsing grup husat bai amamasim ol manmeri long Mt Hagen So long dispela wiken.

long go long Hagen. Tasol rot ol i mekim wantaim Air Niugini i go stret tumas.

Dispela i mekim na wokabout bilong ol dispela lain long Mekeo i bin kensel.

Tasol i gat narapela grup bilong Sentral bai i go long so long hailans. Dispela grup em bilong Gaire viles.


Dispela ol lain Gaire bai i soim stret ol stail bilong tumbuna danis

em ol i save wokim taim bilong lakatoi i ron i go na tu ol narapela singsing bilong amamasim ol manmeri.

Mista Kundu i tok olsem ol wan wan grup bilong nambis husat bai

putim tumbuna singsing bilong ol long Mt Hagen So bai kisim samting olsem K900 o K1,000.

Mt Hagen So Sosaiti bai givim kaikai na tu givim haus-slip long ol grup husat bai go long so.



NIUGINI BUILDING SUPPLIES

SUPPLIERS OF TIMBER, HARDWARE,

PLUMBING, FURNITURE, ELECTRICAL & KIT HOUSE.

WE ARE SPECIALIST IN TIMBER. WE ALSO CAN; CUT, RIP AND DRESS TO YOUR REQUIREMENT (ANY SIZES) WHILE WAITING.

MAKERS OF, ROOFING IRON, GUTTERS, RIDGE CAP, VI CRIMP, RAIN WATER TANK AND SHEET METAL.

STOCKIST OF ALL KINDS OF ... Timber mouldings and profiles, CCA treated posts, cement, louvres glass, nails, bolts, screws, plywood, masonite, fibro, hinges, padlocks, Dulux paints and GENERAL BUILDING MATERIALS.

WE HAVE EVERYTHING FOR BUILDING

CALL US NOW!

Lae Branch
P O Box 1296
Lae, MP
Tel: (675) 472 5069
Fax: (675) 472 5088

Mt. Hagen Office
P O Box 1293
Mt. Hagen, WHP
Tel: (675) 545 1499
Fax: (675) 545 1376

Wabag Branch
P O Box 383
Wabag, Enga Province
Tel: (675) 547 1124
Fax: (675) 547 1225

Mendi Branch
P O Box 1293
Mt. Hagen, WHP
Tel: (675) 549 1319
Fax: (675) 549 1316

MT HAGEN SO SPESEL

So bai kamap long Rebiamul ragbi oval, i no Kagamuga

MT HAGEN kalsarel bilong 1997 bai kamap long Rebiamul ragbi lig oval. Las yia na ol narapela yia bipo, Mt Hagen So i save kamap long Kagamuga so graun, tasol long dispela yia tasol ol i senisim liklik.

**JAMES
KILA**
i raitim

Sampela ol samting we i save kamap long ol so long bipo, tasol bai i no inap kamap long dispela yia em ol man i kalap long parasut na dispela ples we i laif-ben i save pilai musik.

Dispela ol samting bai i no stap long progrem bilong 1997 Mt Hagen So.

Planti ol bikpela kampani na sponsa husat i save sanapim ol stol o haus bilong ol long so-graun bai i no inap kamap long so, bikos i gat liklik spes.

Dispela em bikos ples bilong holim so long dispela yia em ol i senisim i go long Rebiamul ragbi lig oval.

Las yia na ol narapela yia Mt Hagen So i save kamap long Kagamuga So graun.

Mista Kuk i tok ol bai lukluk long kisim samting olsem 30 na 40 singsing grup i kam long dispela kalsarel so.

Sampela ol lain grup husat bai putim kamap ol singsing bilong ol em ol lain bilong Oro, Sepik,



• Ol pipel bai inap lukim ol singsing na amamas na bung wantaim.

Madang na ol lain Mekeo bilong Sentral provins. Ol lain Mekeo em wanpela lain we i save bilasim pes bilong ol gut tru wantaim ol stail kala peint.

Planti bilong ol i save-putim ol longpela kangal bilong pisin we i gat naispela kala tru.

Mista Kuk i tok olsem bai ino gat ol nupela ol samting bai kamap

long so long dispela yia. Tasol em i singautim ol manmmeri long go na lukim ol tumbuna singsing na amamas wantaim ol femili bilong ol.

Em i tok tu olsem bai i gat bikpela sekuriti long dispela so. Ol polis bai stap strong long was na nogat trabel i ken kamap

Pacific Mobile Communications

congratulates

Securimax

on their 10th anniversary in PNG!



Keeping in touch is now
easier than ever!

GET MOBILITY, SECURITY
& CONVENIENCE



Your Gateway to the
Internet . . .

Your Pathway to the
Future!

P.O. Box 6973, Boroko, NCD. Telephone 323 2555 Facsimile 323 2554

MT HAGEN SO SPESEL

Nupela 5-ya plen long mekim Mt Hagen gutpela ples long stap

SIAMAN bilong Mt Hagen Siti Autoriti, Peter Kewa i lukluk long putim kamap wanpela 5-ya developmen plen long mekim envaironmen long Mt Hagen siti i gutpela moa long ol bisnis na ol manmeri long stap long en.

Mt Hagen em wanpela bilong ol 3-pela siti insait long Papua

Niugini na em i stap long Westen Hailans na i gat planti ol gutpela kalsa na tredisen bilong ol pipel i stap we ol turis i ken amamas long lukim.

Wanpela bilong ol dispela bikpela samting

JAMES KILA i raitim Mista Kewa i tok program ol bai

droim ap bai go wantaim gutpela wok bung wantaim ol lain husat i save long wok. Sampela long ol dispela lain em ol taun-plena, na ol lain long Lens and Biding bod.

Sampela ol samting we bai i stap insait long dispela 5-ya masta plen em long wokim wanpela siti-hol o

bikpela opis, ol haus bilong bas-stop, ol bris bilong ol man i wok-abaut antap klostu long maket, ol strit-lait, na ol jeneral bilas insait long Mt Hagen siti.

Mista Kewa i tok em bai lukluk tu long ol hevi we i save kamap taim ol skwata setelmen i stap. Em i tok em bai givim sampela graun i go long

ol sampela pipel husat i bin stap long hap long longpela taim.

Mista Kewa i tok em bain givim wok long wanpela konsalten kampani bihain long lukluk na givim ripot long gutpela rot bilong rausim ol rabis pipa na ples bilong putim ol dispela samting.

Em i tok tu olsem ol bai lukluk long ol haus namel long Mt Hagen siti na rausim ol dispela we i no gutpela tumas na ino bihainim ol lo bilong ol autoriti.

Mista Kewa i tok taim dispela 5-ya program i kamap em i laik long wokim gutpela piksa bilong siti na wokim kamap gutpela wok namel long ol bisnis na ol bai amamas long karimaut ol wok invesmen insait long Westen Hailans provins.

Em i tok tu olsem gutpela wok bung i mas stap namel long gavman, ol bisnis-haus, ol manmeri husat i stap long siti na siti autoriti em i wanpela bikpela samting we i ken mekim Mt Hagen siti i wanpela gutpela siti tru long stap long en.

Mista Kewa i tok ol i plen tu long kamapim ol senis-program namel long ol meri na ol yangpela manmeri. Dispela



• Wanpela yangpela bilong Simbu i givim samsam stret. Lukim yu long hagen So.


bai i lukim ol meri na ol yangpela i gat sans long go lukluk raun na soim kalsa bilong PNG long ol narapela kantri.

Ol dispela kantri tu i ken kam long Mt Hagen na soim pasin na kalsa bilong ol na tu lukim Mt Hagen na Papua Niugini.

Em i tok ol i laik strongim ol wok long lainim ol pasin bilong ol

narapela kantri na tu ol narapela kantri i ken luksave long pasin bilong PNG. Dispela i ken helpim tu long givim save long gutpela ol rot bilong ronim siti.

Mt Hagen siti i gat susa siti bilong em i stap long Orange long Niu Saut Wels long Australia na wanpela siti long kantri Saut Korea.



• Penembi singsing grup long Westen hailans

SHORNCLIFFE

BITUMEN AND CIVIL ENGINEERING CONTRACTORS

- * CIVIL ENGINEERING CONTRACTORS
- * AGGREGATE SUPPLIERS
- * BITUMEN AND EMULSION SPECIALISTS
- * HIGHWAY AND AIRPORT CONSTRUCTION
- * ASPHALT PAVING

HEAD OFFICE

Phone: 475 7444

Fax: 475 7398

SHORNCLIFFE (PNG) PTY. LTD.
Centauri Road, Taraka P.O. Box 1554, Lae

PORT MORESBY BRANCH
P.O. Box 6637 BOROKO
TEL: 328 1008
FAX: 328 1233

RABAU BRANCH
P.O. Box 2202, RABAU
TEL: 982 8529
FAX: 982 8348



MOUNT HAGEN SHOW AUGUST 16th & 17th

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.